

ROMAN JÕ KRĨ WÛR Pawrô Jõ Kàhhôc

Pê Pawrô pê Jeju jarkwa na memprar catêjê nõ, ne hanea ne cupê cupêhkà te ikre cahyr catê, ne hàpên xà ata to pê ajco amji to ajpa. Ne pê Jeju na mehkwy jakrã Roman jõ krĩ kam mehkrĩ atajê wÛr, pom cu me hõ kàhhôc cahyt ita kujate. Na pê hõ kàhhôc ita japyr pê **Roman Jõ Krĩ Kam Jeju Na Mehkwy Jakrã Mehkrĩ Atajê WÛr, Pawrô Jõ Kàhhôc** (Roman).

Ne hõ kàhhôc ita kam cute me pamã harên to hajÿr he. Pahpãm mãa me pahcunea kêanre, me panquêt xwy pê Atãw cukwa kam. Na pê me pahcunea me pahtyc xà wÛr me pamprar xà. Ne pê Jeju amji to me pahkritxwÿ, ne me pajaxà kam ty. Ne ihtyc xà ata to, cu ha ampeaj kam amjimã me pahhimpej, quê ha ihtÿj Pahpãm me pahna amji capa. Ne hanea ne Jeju kam me pahhônco xà ita me, hanea ne Pahpãm Carõ Pejti te me pamã, pahteamji kam me pajapac xà intuw impejti jôr xà ita kôt, quê ha Pahpãm me pahna amji capa.

Pê Pawrô me cumã amji jarẽ

Me Hàpên Xà 13.32-33; 22.14-15, 21

¹⁻⁷ Hàpà Roman jõ krĩ kam, me apê me ikwÿ pê, Jeju kam, pahte ajpên to me pahkjêjê atajê. Pê Pahpãm mã me akĩn, na pê me ato hõ tekjê. Ipê Pawrô pê Jeju Crixto mã ijàpên catê, ne hanea ne

ipê harkwa na cumã iprar catê. Ne itea wa me amã ihkàhhôc ita kamihhôc ne ihkujahêc. Ne wa ijõtpê Pahpãm me Pajõ Pahhiti pê Jeju Crixto mã me acajrên to hane he:

— Ÿhÿ, me ijõ Inxũ Cati, ca ha Roman jõ krĩ kam, me akwÿ mehrĩ atajêcaprĩ, ne me caxwÿn caxwãm pê me cumã me acarĩcti gõ, mâr quê nee ame amji mã ampo cupa nare — hane. Ne Pahpãm pê mehcunea mã, ite Jeju pê me pahkritxwÿ, ne cupê me pahkên pê me pahpytâr catê naharên xà impejti itajê caxuw icapi ne ixãm. Ne pê rÿ pëa mã, Pahpãm ramã me pamã Jeju to hũjarênxà impejti ita to awjarê, ne to awjahkre. Pê harkwa na cute mehcakôc catêjê Pahpãm jarkwa jõ kàhhôc kam, Jeju pê me pajõ Pahhiti pê Pahpãm krajũjarên xà impejti ata na mehhôc. Ne Jeju pê mepaxũmrea pyrác na, me pamã hahkre pej. Ampo na? Cupê Tawi xwÿ pê pahhi támxwÿ támxwÿ nõ na, me pamã hahkre pej. Ne hanea ne me pamã, cupê Pahpãm kraa to Pahpãm kra, ne curũam cator, ne nee cute jũ caxuw ampo kên ton nare, ne impej pit na, me pamã hahkre pej. Ne hanea ne carôat týjti te ihtycjirô pê hacpÿa mã to ihtĩr xà ata kôt, me pamã cupêPahpãm kraa to ihkra na hahkre pej. Quê Jeju hamreare na mã, wa nee ipê harkwa na cumã iprarcatê nare. Ne ihcãmtàa rũm, pê Pahpãm ito cumã harkwa na iprar catê, neimã harkwa hyr to hane he:

— Ÿhÿ, Pawrô, ca ha pjê cunea kam, krĩxàre cunea mã, ijarên to apa, ne ito amji mã mehhimpej na me to, quê ito amji mã mehhimpej, ne

me ikampa — hane. Pê wa harkwa kôt to, pê ca hanea ne me awpa, na pê Pahpãm Jeju Crixto tekjêa na amji mã me acapi. Na ri me apê mehkwyã.

Pê Pawrô mã ihtyj me cumã Pahpãm jarkwa jarên prãm

Roman 15.22-29; Me Hàpên Xà 28.15

⁸ Ûhỹ, pê wa hõtpê ajco Pahpãm mãme acunea pyrên ijakryti na amji jarê. Ampo na? He pjê cunea kam Jeju Crixtoçãmtàa rûm ate amji mã me Pahpãm to hajyr, ne ate amji mã me to ahimpej na, cumã me gahkre pej.

⁹⁻¹⁰ Ne wa ijĩ me ite amji kam ijapac xà cunea to Pahpãm mã apê, na wa mehcunea mã ihkra pê Jeju pê me pahpytâr catê na harên xà impejti atajê jarên to ipa. Ne Pahpãm mã, ite me acajrên to ipana ijahkre pej, na quê ihtyj ahna ijarê. Ne wa hõtpê hãn ne cumã amji cajrên to hane he:

— Me ijõ Inxũ Cati, ate amji kam gapac xàa na Roman jõ krĩ kam me akwý mehkrĩ atajê wýr itêm, ne ite me hõmpun na ito — hane.

¹¹ Ne ampo na wa apu cumã amji cajrên to hane? Nee mã ampo na nare. He imã me apupun prãm to me apupun prãm. Ne me amã Pahpãm Carõ Pejti te mehkwy to impej xà caxuw, me cumã cute amji kamhapac xà te amji jahkre pejti nõ jõr xà ata nõ gõ, mâr quê Carõ Pejti carõat kôt me acaxwãm pê me ato impej, ne me ato ihtyj. Mâr ca xwý kam amji mã me to ahimpej to me apa nare.

¹² Ne pom jũ caxuw pahte me ajpên pupun xà ata caxuw, cu ha me pahcunea me ajpên pupun

kam tē. Ne me ajpēn pupun xà ata kam, cu ha pahte Jejuto amji mā me pahhimpej xà ata na me ajpēn tehcajpar to me mō.

¹³ Ÿhÿ, Jeju kam me ikjêjê, wa rÿ pēa mā me awÿr hān ne amji krār to ipa na, ate me jahkre pej na, me ato prām. Mā hān ne hōtpê ampo, ma me atēte icahpêrkār to ipa. Ne waramā ite krīxàre kwÿ pē mehcahkrit, ne nee me cupê Juta catêjê nare atajê kôt, me cumā, por ite me amā Pahpām jarēn to ijūjarēn atajêa to, wa hān ne mecumā ijūjarēn to ipa. Ne nee ijūjarēn xà atajê kôt hamrenare. He ihtÿj ite me cumā ijūjarēn xà itajê kôt Pahpām wÿr me apkjê. Na wa itÿj cormā me cuxà me awÿr icator, ne me amā, por me acahê na me cupê Jeju jahkre kêatre, mā nee amji mā me toihhimpej nare atajê mā harēn prām.

¹⁴ Ne mēr ampo na mā wa ame ato hane? Nee mā wa ampo na ame ato hajÿr nare. He ipê pjê cunea kam mehcunea mā Pahpām jarēn catê, naquê ha jūm pē krī cati kam mehkrī catêjê nō, nare, cupê ahkêt kam ihkrī catêjê nō, nare, cupê mehkrā kre te amji jahkre pej catêjênō, nare, cupê ampo jahkre kêatre catêjê nō cakrô, wa ha itÿj cumā Pahpām jarēn xà impejti itajê jarē.

¹⁵ Na wa itÿj me awÿr itēm, ne Roman jō krī kam me akrī catêjê mā, Jeju pē me pahkritxwÿ ne me pajaxà kam ihtyc, ne hacpÿa mā ihtÿr na harēn xà impejti itajê jarēn to ipa to prām.

*Nee Pahpām jarkwa jū na Pawrô pahàm nare
Roman 3.21-24*

¹⁶ Ne nee wa Jeju pê me pahkritxwỳ na me amã harên ita na amji jũ na ipahàm nare. Ampo na? He Pahpãm carôt tỳj na ri cupê, cute amji mã me to ihmipej catêjê cunea kên pê me hũtâr catê. Na ri cupê mam me cupê Juta catêjê pytârcatê, ne hanea ne cupê mehcahkrit, pê Juta catêjê nare atajê pytâr catê.

¹⁷ Pê rỳ pêa mã Pahpãm jarkwa na ihkàhhôc kam, mehhôc ata kam, hũjarên to hane he:

“ Quê ha jũm ito amji mã ihmipej, wa ha, cupê jũ caxuw icuna mã, cute ampo kên ton catê nare ata to amji kam ijapac. Na wa ha itỳj ahna amji capa, quê ha icahê naihtĩr na ipa rohnýtti mã ” hane.

Hõhõ, Jeju jũjarênxà imejti ita te ri me pamã ita jarên.

Mehcunea mã Pahpãm ipa na, hahkre pej

Me Hapên Xà 14.17; 17.22-29; Ipipên Xà 9.20-

21

¹⁸ Ne ramã Pahpãm te me pamã pjê ita kam mehkra kèanre kam incryc xà ata jarên, cu pahte me hahkre pej. Ne pom mehkra kèanreitajê te amji kam me hapac xà cunea tũmti, ne ihkèanre. Ne nee ampo pejti, hêj xi nare to me amji kam hapac to me ipa prãm nare. Ne atajê ri Pahpãm te ame to kên xà na, ramã me pamã hahkre pej. Ampo na? Mehkên xà itajê, ma cute me Pahpãm jahkre pej xà ata to me cupê amxu.

¹⁹ Ne pê ramã hanea ne Pahpãm me cumã amji to ajpê, cute me kam hapac, ne me hahkre pej

prãmtẽ. Mã nee xãmte cute mempar, ne amji mã me to ihmipej nare.

²⁰ Ne pê ramã jũm te Pahpãm pupun xà nare ata, pjê me cõjkwã itaton pëa mã, kam ampo itajê cunea to. Ne hàpênxà atajêa kõt, quê ha cupê Pahpãam to Pahpãm, ne ihtýj na me hahkre pej. Nehanea ne cutea ri carõt týjti to hàpên xà itajê ton na me hahkre pej. Cwýrjapê quê ha nee jũm, cute ampo pupun xà itajê na hàprãr to amji jarên to:

— Wa nee ite xãmte Pahpãm te ihkrĩ na hahkre pej nare — hajýr nare.

Nee mehcunea mã Pahpãm to amji mã mehhimpej prãm nare

²¹ Ne cute me Pahpãm jahkre pej cãkrõ, nee amji mã meto cati prãmte me harên to:

— Ampeaj kam ri apê Pahpãam to Pahpãm — hajýr nare. Ne cute me hàpên xà pejti ton atajê pyrên me hakryti na cumã me amji jarênxà kaj na, ajte ampo kên to pit mã me amji kam hapac to me ipa. Ne cute me amji kam hapac xà kõt hamreare atajêa to pit mã me amji kam hapac to me ipa. Ne mehkrã kam ampo kên to cute me amjikam hapac xà itajê pê ihhêj rũm awcapãtkõti kam amõr xà na, ate amji pupun xà nare ata pyrãac, na quê ha nee me cumã me cute amji kam hapac xà impej hamreare ne.

²² Ne me cupê amji jahkre kêatre, na ri ihtýj mehkrã kreti na ame amji to mehêj to me ipa.

²³ Ne nee ajte cute me Pahpãm tĩr rohnýtti mã ata to amji mã me hàmnãn to ipa nare, ne ihcunea na me harên pejti to ipa xà kaj na, ihtýj

mehõ pahpãm cahàc pê, ampo cunea krekà atajê to amji mã me hãmnan to me ipa. Atajê pê me hũmre krekà me, pryjara krekà me, ampo pry krekà me, cagã krekà carĩcti, cakõc nare atajê, ne mempar nare cakrõ, mã ajte meharên to impejti to me ipa, ne toa amji mã mehhimpej.

²⁴ Ampo na? He me hũmre itajê te amji jahkre kêatre, na ri ihtỳj me ampokên ton to me ipa, cwỳrjapê ri Pahpãm te mehkên itajê mea mã me hicu, ne me cumã harkwa to:

“Hamre, ca ha amjia kõt, ate amji kam megapac xà kên itajê ton to ame apa, wa ha nee hipêr me ato ihmpej nare” hajỳr.

Na ri ramã me hũmre ame ajpên to kêanre, mã hanea ne pyjê ame ajpên to kêanre, cute me ampo kên kam me pahpahàmti atajê ton to ame ipa incwỳrjapê.

²⁵ Ne cute me Pahpãm hêj xi nare ata jicu, ne ma me hõ Pahpãm cahàc krekàkêanre hêj xiti ata wỳr me hàr. Nenee ajte me amji mã Pahpãm te pjê ton, ne kam ampo ton catê ata kїн nare. Ne hanea ne, nee me cumã harkwa to:

— Apeaj to apej, ne apê me ijõInxũ Cati pê me ijõ Pahpãm — hajỳr nare. Ne ajte cute pjê kam me ampo ton atajê mã me harkwa to:

— Apê me ijõ inxũcati pê me ijõ pahpãm, na wa ato pit mã, me amji japackre, ne atoa me amjimã me ihmpej to me ipa — hajỳr. Ne pjê kam pahte ampo itajê mã me pahcakõc to hajỳr xà na ihkaj na, ne ihkêanre, ne quêtPahpãm mã ri me pahcakõc xà te hajỳr na impejti.

*Mehcunea te amji kam hapac xà kên pit
Ipipên Xà 22.11*

²⁶ Mā mehcunea mānea mā mehkên xà kēanre kam mepahpahàmti atajê ton to me ipa, kam ajte cute me to încrà tu. Cwỳrjapê riPahpām te me kam incryc xà to me cumã harkwa to:

“Gapacta ne, ate me ampo kên tonto prãm atajê cunea ton to me apa” hajÿr.

Cwỳrjapê ri pyjê me, me hũmre te me ajpên caxun jicu, ne pyjêa me ajpên caxu. Ne Pahpām mā cute me ajpên to hajÿr xà ita na ihkaj na.

²⁷ Mā me hũmre te me hajÿar ne cute mehprō caxun jicu, ne me hũmrea me ajpên caxun prãm kam ame ipa. Ne ihtỳj ajpên caxuw me ampo kên itajê ton to me ipa, na quê ha Pahpām me ahna mehkên xà ata to ihtỳj tu, quê ha ame to kēanre ne.

²⁸ Pê Pahpām me cumã amji to ajpê cakrō, mā nee mempar, ne me hahkre pej prãm nare. Cwỳrjapê ri Pahpām te me hucu, mǎcute mehkên ton xà atajêa me to ihhimpej to ipa. Cwỳrjapê ri jũ caxuw cute me ton jicu nare. Mā tee intête me hapackre, mā nee me hũpar nare.

²⁹ Ne cute me ampo kên ton xà itajêa te ramã me to hipu tu, na ri ihtỳj me ajpên caxun prãm kam ame ipa. Nemehkwỳ pē, ampo cunea to amji mā ihtũm prãm to me ipa. Ne jũ wỳr quê mehkên ton tēte me amji jiprō, ne ihtỳj ajpên jũ na me cumã ampo kīn. Mā ihtỳj me ajpên curan to me ipa. Ne ihtỳj me harkwa to me ajpên cujtên to me ipa, ne ihtỳj ame ajpên mǎihhêj to me ipa.

Ne mehkwȳ te jũ mã me ton nare kam, cama me cupê ame ampo to ipictor to me ipa. Ne ihtÿj mehhêj xi to me xwahna to me ipa.

³⁰ Ne ihtÿj ajpên na mehçakôc kêanre to me ipa. Ne ma ame Pahpãm curê, ne nee me hõpahhi kam mare mã, ahna mehçakôc kên na me hàhtàt nare, ne me cumã amji to cati prãm to pit mã, mehçakôc to:

— Pa ri me acunea jirôa pê icati — hane. Ne ahpÿanre na cumã, cute ampo kên ton xà jàhtôa ton to, to ipipê to me ipa, ne nee me hũmjê me, menxyrxwȳ impar nare.

³¹ Ne me cupê ampo pejti ton jahkre kêatre, na ri ihtÿj me ampo kên pit ton to me ipa. Ne neecute mehçakôc xà to mehçakôc atajê na, me amji par nare. Ne ihtÿj mehkwȳ to me hàprê to me ipa, ne nee me cumã jũm caprĩ xà nare.

³² Ne ramã cute me hajÿr catêjê caxuw Pahpãm te me to ihmipej xà ton, mã cute ahna mehhôc ne me hahkre pej, ata jarên xà te:

“Por ampo kên ton to me ipa atajê ri mehtycxà,
ne nee Pahpãm cahê na ame ipa xà nare.

Ampo na?

Quê ha ihtÿj mehkên mã me cumê” hajÿr.

Na me cumã hahkre pej cacrô, mã ihtÿj cormã me ampo itajê ton to me ipa, ne mehkwȳ me, me ajpên mã:

— Ate me ampo kên ton itajê kôt, imã meapeaj to me apej — hajÿr to me ipa.

2

Cute me to kên jahpan xà na Pahpãm mã me hãmjõr xà

¹ Ýhỹ me ikwỳ, ca ihhêaj to mehkên itajê na me harên pa, ne nee me amji mã harên to:

— Jũmjê itajê kêanre, ne pa nare, nee quêt ikênnare — hajỹr nare. Ampo na? Ca ihhêaj to hanea ne me akên itajêa ton to me apa. Cwỳrjapê ca atỳj ate me amji jarên xà ata tome caa, me amji curê capa.

² Ne me pamã, quêt catyt kam Pahpãm te ipa na hahkre pej. Na quê ha catyt kam mempej catêjê me, mehkên catêjê to ajcapô, ne mempej catêjê impej mã me cumẽ, ne mehkên catêjê mã:

— Ramã ite me amã ampo kên jarên, ne me amã ihcawpa, ca mãnea mã ate me ton, na wa ha me akên mã me amẽ — hane.

³ Ne me ca, ca ha ate catyt kam me apa nare na, nee ca ha me jũmjê kên jarên pa, ne me harên to:

— Jũmjê itajê catyt kam me ipa nare, ne-mehkêanre, cwỳrjapê quê ha Pahpãm mehkên mã mecumẽ — hajỹr nare! Ampo na? He ate me hajỹr ne me akêanre ita kam, ca ha nee Pahpãm te ato kên xà ita pê jũ kam atêm nare.

⁴ Ne ca ihhêaj to me anõ garkwa to:

— Pahpãm pej ne hàhcaprĩ, cwỳrjapê quê ha nee ite ikên ton itajê jahpan xà na ikên mã imên nare — hajỹr nare! Ampo na? He Pahpãm jàhcaprĩ na ri incaca xà amji mã ampeaj ne hapôj to ipa. Na quê nee akên mã amên pyrentu nare, ne ihtỳj hipêr amji mã ampi ne akôpĩr to

mõ, ca ihhêaj to akên ton jicu, quê ha nee akên mã amên nare.

Quê ha Pahpãm me pajàpên xà jahpan xà na me pamãamgõ

⁵⁻⁶ Ne quê ha jũ caxuwPahpãm te me pahcukij, ne me pahto ipicokjêr xà jõ amcro cato, quê ha incryac kam, ahpÿanre na mehkên catêjê kên mã me curê, mehkên jahpan xà na. Na ca ha me anõ te akrã kêanre, mã Pahpãm jãhcaprĩhti te me amã me akên itajê cawpa cakrô, ca ha mãnea mã akên ton to apa na, ca ha me ca ramã amji caxuw Pahpãm mã mencryc to apicamên to me mõ. Ne ahpÿanre na pjê kam, cute ampo ton to me ipa xà na Pahpãm te me hõmpun, ne me hahkre pej xà atajêa kôt, quê ha me cumã hãmjôr to mõ.

⁷ Ne por catyt kam, cute amji kam me hapac xà imejti to me ipa kam me to incrà atajê ri, Pahpãm mã me amji cajrên to me hane he:

— Me ijõ Inxũ, ca ha ca me ito me icati, ne ipejti na meijarê. Ne nee jũmjê te me ito icati, ne ipejti na meijarên na imã me to prãm nare. Wa cama acahê na me ikrĩrohnÿtti na me amji to prãm — hane. Atajê mã quê haPahpãm mehtĩr rohnÿtti mã na me to, mãr quê cahê na me ipa rohnÿtti mã.

⁸ Ne mehkwy te nee me hajÿr nare, ne mehkênto pit mã me amji kampa. Ne cute ampo ton to me amji cajpuaw xà atajê to pit mã me to me ipa. Ne ma ame catyt kam ampo pejti atajê caca, ne ampo cupan xà kên atajê to pit mã me amjjahôt to me ipa. Ne cute me hajÿr catêjê, quê

ha Pahpām me kam incryac kam, me ahna cute mehkên ton atajêa to ihtÿj tu.

⁹ Ne por pjê cunea kam me ampo kên ton to me ipa atajê, quê ha me amji pupun xà kêanre to me amji pupu. Quê ha xa mam me cupêJuta catêjê me amji pupun xà kêanre to me amji pupu, jirô pê quê ha cormã mehcahkrit atajê haneane me amji pupun xà kêanre to me amji pupu.

¹⁰ Ne quêt catyt kam, cute me amji kam hapac xà impejti to me hàpên to me ipa atajê, quê ha Pahpām me cumã ampo pej pit gō, ne me cumã harkwa to:

— Wa ha me acati na me ato, ca ha mehcunea kammare mã me acatia to me acati, quê ha me apupu, ne mehcunea me apejti na me gahkre pej. Ne wa ha me amã icarĩcti gō, quê ha neehipêr me amã ampo hũpa nare — hane. Quê ha mam me cupê Juta catêjê to hane, ne hapu na mehcahkrit to hanea.

Pahpām mã pjê cunea kam ampo krĩxàre cunea pipēnpit

¹¹ Ne Pahpām pjê cunea kam, mehcunea to amji kam hapacxà to ajpên pit.

¹² Ne mehcahkrit pê Pahpām te me to ihhimpej xà jahkre kêatre. Ampo na? Nee me cumã Mojxe xwÿ jō kàhhôc hamreare. Cakrô, hōtpê me caxwãm pêcute amji to me ihhimpej xàa kôt, hajÿar ne, nee ihkôat me ipa nare. Na quê ha ihtÿjPahpām, cute mehkên ton jahpan xà na, mehkên mã me cumê. Ne pê rÿ pêa mã me cupê Juta catêjê, Pahpām te me to ihhimpej xà jahkre pej cakrô, nee me to amji japackre nare, ne ihtÿj

mehkên xà cunea ton to me ipa. Jahpan xà na quê ha Pahpãm me cumã harkwa to:

— Me amã, ite me ato ihmpej xàcunea na, ijahkre pej cacrô, ca nee me ito amji japackre nare, cwÿrjapê wa ha Mojxe xwÿ jô kàhhôc kam, ite me ato ihmpej xà atajê kôt, me akam icryc xà kêanre to me atoapê — hane.

¹³ Ne nee mã catyt kam jũmjê atajê te meMojxe xwÿ te me to ihmpej xà cunea jahkre pej xà atajê kôt, Pahpãm te jũmjê atajê na amji caxàr nare. Ne quê ha xa me hahkre pej, ne ihkôat cute amji kam me hapac xà to me hâpên to meipa na, quê ha Pahpãm cormã jũmjê atajê na amji capa.

¹⁴ Quê ha mehcahkrit te Mojxe xwÿ jô kàhhôccukwa kam me Pahpãm te me to ihmpej xà jahkre pej nare cacrô, ne amjia kôt me caxwãm pê, me hĩa kam cute amji kam me hapac xà imejti ton to me môr na, quê ha ihhêj ne ramã me kam, me caxwãm pê Pahpãm te me to ihmpej xà ata kôt ame ipa.

¹⁵ Ne quê ha catyt kam, cute amji kam me hapac xà imejti ton to me ipa atajê, quê ha ramã caxwãm pê Pahpãm te me to ihmpej xà na me harê. Ne quê ha hanea ne ampo pej to, ne ihtÿj ahna amji jarên to:

— Wa ite ampo pejti ton — hane. Ne hanea ne jũm te cute ampo kên ton na hõmpun narekam, me taa ahna amji jahkre pej, ne ihtÿj amji mã:

— Mã ajte, ite ampo kêanre itaton — hane. Hajÿr xà ita ihtÿj caxwãm pê cumã Pahpãm jarkwa na harê.

16 Hõhõ, pom wa ite me amã ijũjarẽn xà toijũjarẽn xà ita kõt, quê ha jũ caxuw me pajõ Pahhiti pê Jeju Crixto, Hũm jarkwa kõt me pahcunea cukij, ne me pahto ajcokjê. Ne cumã me pahcaxwãm pê pahte amji kam me pajapac xà cunea jahkre pej, cwýrjapê ri hãn ne catyt kam me pahto ajcokjê.

Cu ha nee jũmjê jirõa pê me pampejti na, amji to mepajãmnãn nare

Roman 3.19-20

17 Ne wa ha ita caxuw Pahpãm na mehkwy kam me apêJuta catêjê mã, wa ha ita na ihhõc. Pom ca meapê Juta catêjê me amji to me gãmnan to:

— Me ipê Juta catêjê, cwýrjapê ri Pahpãm mã jũmjê atajê jirõa pê me ikĩn. Ne pê Pahpãm me imã Mojxe xwý jõ kãhhõc kam, cute me ito ihhimpej xà cunea gõ, ne wa ite me Pahpãm te me ito ihhimpej xà pupun, na ri me imã amji jahkre pej. Ne me ite Pahpãm te me ito ihhimpej xà cunea to amji mã me hajýr to ipa, cwýrjapê quê haito impejti ne — hane.

18 Ne me amã Pahpãmte ampo ton xà na amji mã me ato prãm xà ata na hahkre pej. Ne ramã ate me hõ kãhhõc to hahkre, ne me amã catyt kam, ate me ampo pej pit ton xà na, amji mã me capi na, me amã amji jahkre pej.

19 Na ca atýj me amji jarẽn to:

— He me ipê hàhcujro xà pyrãac, na wa itýj awcapatkõ pĩn, jũmjê impejti xà ata wýr me hajo to me mõ. Ampo na? He jũmjê itajê pẽmento tũm pyrãac, ne nee catyt kam cumã Pahpãm te

me toihhimpej xà impejti ata jahkre pej nare, na wa itỳj amji kôt me to mō.

²⁰ Ne me ipê, mehkà te amji jahkre kêt catêjêatajê mã, amji jahkre pej japôj catêjê. Ne hanea ne me ipê ahkrare mã ampo to hahkre-catêjê, mār quê catyt kam me ipa — hane. Ne caame amji caprỳ jarěn to me apa. Ca hanea ne me amji jarěn to:

— Ampeaj kam ri ramã meimã Pahpãm te me ito ihhimpej xà cunea jahkre pej partu, ne ite me ampo cunea jarěn xà atajê pê ampeaj kam, ne nee ihhêj xi nare — hane.

²¹ He pom me apê me cumã ampo to hahkre catêjê ita? Ne mēr ampo na mã ca ajte nee me amji mã ampo to hahkre nare? Ne ca me hapackre to:

— Nee ame gàhkīj nare — hajỹr cakrô, mōrmō ca atỳj me cuxà me ahkĩ.

²² Ne me hũmre japackre to:

— Ca ha nee me aprō kaj na, ahti na, jũm cahãj caxunnare — hane. Ne hanea ne pyjê japackre to:

— Ca ha nee me apjê kaj na, ahti na, jũm xũmre caxun nare — hajỹr cakrô, mōrmō caatỳj ate me cuxà ahti na jũm caxun. Ne cama apu pahpãm cahàc krekà caca cakrô, mōrmō ca atỳj hũrkwa mã me acjêj, ne kam ampo to me cupê ahkĩ.

²³ Ne ca me amji jarěn to:

— Pê rỳ pèa mã Pahpãm me imã cute me ito ihhimpej xà gō — hajỹr cakrô, mōrmō ca atỳj me cuxà, ate harkwa jirô pê me apỳm, ne me cumã ihpahàm catia ton to me apa.

24 Ne pê Pahpãm jōkàhhôc ramã me ato hũjarẽn to hane he:

“Me apê Juta catêjê pê Pahpãm na mehkwỹ.
 Ne me amã cute amji kam hapac xà jahkre pej
 cakrô, ca nee ihkôt me hakop, ne me ton
 nare.
 Cwÿrjapê ri mehcahkrit atajê ihtÿj me
 akôtPahpãm japrỹ to mehcahôc kêanre to
 me ipa” hane.

25 Ÿhÿ, ipê Pawrô, ne ipê hanea ne Juta catêjê
 kwÿa nõ wa. Cwÿrjapê ri imã pahte amji kam
 me pajapac xà cunea jahkre pej. Ne pê rÿ pëa
 mã Pahpãm me panquêtjê mã harkwa to:

“Me apê itekjêa na, cute me gahkre pej xà na, ca
 haamji mã me apy kà kwÿ kryjre ne me
 hakep, me akra xũmremea mã” hane.

Cu ha me Pahpãm te me pahto ihhimpej xà
 cunea kôt me papa, ne hanea ne amji mã me
 pampy kà kwÿ jakep, ne ahnaa cu ha me Pahpãm
 cajpuaw, ne cumã me papê Juta catêjê impejpit,
 ne me papê mehkwỹa. Nãmri cu ha pahte cama
 me amji kà kwÿ jakep, ne nee amji mã me
 Pahpãm te me pahto ihhimpej xà kôt me papa
 nare na, jũ wÿr cu ha Pahpãm cajpuaw. Ampo
 na? Pahpãm mã pahte cama me amji kà kwÿ
 jakep, ne nee cute amji kam hapac xà kôt me
 papa nare ita kôt, cumã hamreare.

26 Quê ha jũm pê Juta catêjê nare, ne nee amji
 pê ihkà kwÿ jakepnare cakrô, ihtÿj Pahpãm te

me to ihhimpej xà kampa, neihkôt ipa na, quê ha Pahpãm mã cupê ramã cute amji mã mehkà kwỳ jakep atajê nõa, ne cupê hõ tekjêa.

²⁷ Cwỳrjapê quê ha mehcahkrit atajê me anaihcakôc to me hane he:

— Por Juta catêjê atajê mãihkàhhôc kam Pahpãm te me to ihhimpej xà cunea jahkre pej, ne memy kà jakep cakrô, mã ajte nee kam me hapac, ne ihkôat me ipanare — hane. He me cupê Juta catêjê nare, pê nee memy kà kwỳ jakep nare cakrô, ihtỳj Pahpãm te me to ihhimpej xàa kôt me ipa, atana ri me Pahpãm cajpuaw.

²⁸⁻²⁹ Ne mễr hõhõ, me pahkà kwỳjakep ata me, pahte amji kam me pajapac xà to me pahte amjipyràc xà atajê kôt, Pahpãm mã hamreare. Ne quêt, porPahpãm Carô Pejti kôt, Pahpãm te me pahto ihhimpej xàa kôt me papa na ri cumã impej, ne cumã me papê mam, mehkwyỳ pê Juta catêjê impeaj. Ne quê ha pjê kam me hũmre me pahkà jakep nare na me pahpupu, ne nee amji mã, me papê Pahpãm kôt meipa catêjê na me pahto hajỳr nare. Ne Pahpãm nare, quêt cumã me papê mehkwyỳa, na quê ha taa me pahto ihcakôc to impejti ne.

3

*Jũ wỳr quê Pahpãm me pahnõ mã ihhêj
Roman 9.4-5*

¹ Ýhỹ me ikwỳ, ca ihhêaj to Juta catêjê to ite me amã icakôc xà ita kampa, ne nee ca me anõ amji mã garkwa to:

— Mễr jũ na xà caxuw mã me cupê Juta catêjê? Ne mehaprỳ pê Juta, ne jũ na xà na mã amji mã

mehkà jakep? Imã ihhêj ne Pahpãm te mam me to ihmipej xà itajê kôt hamreare — hajÿr nare.

² Ampo na? Por cute mencaca xà to me amji pyrác xà itajê cunea impej pit. He Pahpãmpê ramã rÿ pêa mã amji mã me capi, ne me cumã haprÿ ita gõ, ne mecumã cute amji kam hapac xà cunea pê harkwa ita gõ. Ne ihkôt me cumã:

“Ca ha ite me amã ijarkwa jirên xà itajê cunea to, ma me amji jahôt to me apa, ne ma me to amji kampa, ne ihkôat me apa” hane.

³ Mã mehkwy kwÿa te ihhêj ne, nee mempar nare. Ne mehkwy nee me harkwa to mehçakôc xà na me amji par nare ita kam, xà ajkîPahpãm te hajÿar me caxuw, ne ampo na ihçakôc xà to, ne nee amji jarkwa na amji par nare?

⁴ Hãpà! He Pahpãm catyt kam ihkrî, ne ihhêj xi nare, ne ihtÿj mehcunea hêj xi xà jipôc ri harkwa na amji kampa. Ne pê ramãrÿ pêa mã Pahpãm jô kàhhôc kam, cute me to hÿjarên to hajÿr he:

“Quê ha jÿm te, Pahpãm te apu ihhêj xi na harên na, quê ha ramã mehcunea mã apu ihhêj to ipa na me hahkre pej.

Quê ha cute catyt kam me Pahpãm toihçakôc na, quê ha ramã mehcunea catyt kam, cute to ihçakôc na me hahkre pej” hajÿr.

Ihcunea na Pahpãm pejti, na ri ma amji tête amehkênçatêjê curê

⁵ Mā mehrā kên catêjê kwỳ me to hũjarēn xà impejti kaj na me to hũjarēn to:

— Wa itỳj Pahpām kĩnte ampo kên jikōtti cunea ton to ipa, mār quē ahna me ipupu, ne cormā me Pahpām caca xà me, itekjê to me ajpēn, ne me hōmpu, ne amji mā me ijarēn to: “Jũmjê itajê kêanre, ne Pahpām ri quêt impeaj to impej” hane. Ita kam, jũ mā quē, ne ajte Pahpām ite me ikên xàton ita kôt me ito tỳj tu? He me icaca xà kêanre ita kôt, ramā mehcunea te me Pahpām pejti na me hahkre pej. Ne ite me hajỳr xà ita kam, ihhêj ne nee Pahpām catyt kam me ito impejti nare — hane.

⁶ Ne por jũm apu hũjarēn to hajỳr to mō ata kêanre. Ampo na? He Pahpām ri quêt catyt kam ipa. Ne quē catyt kam ipa nare ita kam, jũ mā quē, ne ajte pjê ita kam ajpēn pê mehkên me, mempej to caprār pa?

⁷ Mā mehrā kên catêjê kwỳ hanea ne me hũjarēn to:

— Wa itỳj Pahpām kĩnte ame ihêj xia jarēn to me ipa, mā me ikampa, ne me Pahpām cakôc xà me, me icakôcxà to me ajpēn, ne me amji mā me harēn to: “Pahpām cakôc xà ri quêt impej” haneita kam, jũ mā quē, ne ajte Pahpām me ikên māmē imē? He me icakôc xà hêj xi xà ita kam, ramā mehcunea te me Pahpām pejti, hêj xi nare na me hahkre pej — hane.

⁸ Ne mehcakôc xà to cute me hajỳr xà na impejti nare. Mā mehrā kên kwỳa mehcakôc xà to:

— Hã, cu ha pahte amji kam me pajapac xà to me kêanre to me papa, mār quē ihkêanre ata kôt, me Pahpām jàhcaprĩhti na me hahkre pej —

hane. NePahpãm mã mehcakôc xà te hajÿr na ihkaj na. Ne hanea ne ramã mehkwyà kwÿ nõ te ito ihcakôc to hajÿar. Ne ihtÿj ame ito ihhêj to me ipa. Ne cute ame ito ihhêjjahpan xà na, quê ha Pahpãm ame to kêanre ne. Ne mehcakôc xà kêanre te hajÿr catêjê ri, ihtÿj mehkên mã me hàr xà.

*Nee pjê ita kam jũm pê catyt kam ipa catê nare
Carati 3.11-22*

⁹ He xà ajkĩ mehcakrit atajê jirôa pê, me cupêJuta catêjê mã me cute amji kam hapac xà impej? Hãpà! He Pahpãm mã mehcunea pipên pit. Ampo na? He mehcunea ihtÿj ajpên jĩkjê na mehkênton to me ipa. Ne ramã mehcunea te ajpên jĩkjê na, cute mehkên ton to me amji pyrác tu, ita kam, jũ mã quê me, ne mehkên ton to me ipa jicu, ne me to hapactu?

¹⁰ Ne pê ramã ihkàhhôc kam Pahpãm jarkwa me to hũjarên to hane he:

“Pahpãm mã, nee jũm te ampo pejti ton nare.

¹¹ Ne nee jũm Pahpãm na hàhcukjêr, ne catyt kam cumã ipa jahkre pej nare.

¹² Ne ramã mehcunea Pahpãm pê me ipipkjêr, ne ihkaj na ampÿa mã ame ipa, ne me ipictor. Na ri nee jũm catàt kam, ampo pejti ton to ipa nare.

¹³ Ne me harkwa pê ihhêj rũm kre kam, cute me harêt xà.

Ne mehcakôc xà atajê kro, ne ihkêanre, ne ihtÿj ihpĩn mehhêj xi xà kêanre hapôj.

Ne mehcakôc xà itajê jàhcure pêihhêj rũm patti xwa cacô jàhcure, ne ihtÿj mehcura.

14 Ne ihtÿj mehcunea incrôn xà kêanre to men-crôn to me ipa.

15 Ne ihtÿj me hÿjarêan kam me jÿm jaxôp, ne mehcuran pyrentu to prâm.

16 Ne por jÿ ri me ipa xà ata ri, hân ne me hakàn pê ampo kêanre ahtwÿ.

Mã me hakàn pê me cumã amji kÿn nare na amehkrÿ.

17 Ne nee me cumã ajpën to impejti to mehkrÿ jahkre pej nare.

Mã cama ame ajpën mã, ne ihtÿj me ajpu.

18 Ne nee amji mã me Pahpãm cupa nare” hane.

19 Hôhô, pê Pahpãm Mojxe xwÿ mã Juta catêjê caxuw cute me to ihhimpej xà jôr to hane. Ne pê Pahpãm te me to ihhimpej xà ita, nee me cupê Juta catêjê caxuw pit mã nare, ne me pahcunea caxuw pê Pahpãm Mojxe mã cugô. Na cu ha catyt kam pahte me cahyt ne memparna, cu ha pahte me ampo to kên xà atajê na me amji jahkre pej pyrentu. Cwÿrjapê cu nee me pahnô Pahpãm mã me pajarkwa to:

— He wa nee me ite ampo pejti ton xà itajê na me amji jahkre pej nare. Ne nee hanea ne ite me ampo kêanre itajê jahkre pej nare kam me ton — hajÿr nare. Cwÿrjapê quê ha Pahpãm amcro nô na mehcunea mã harên to:

— He me amã ite me ato ihhimpej xà cunea jahkre pej cakrô, ca nee ate mempar nare, cwÿrjapê wa ha hahpan xà na me ato tÿj tu ne — hane.

20 Ne nee rÿ jÿ caxuw jÿm te, Pahpãm te me to ihhimpej xà kam hapac, necatyt kam ihkôt

ipa nare. Cwÿrjapê jũ wÿr cu Pahpãm te me to ihhimpej xà kôt me papa kam me to pancrà. Ampo na? He cu me pajôtpê ampo to mehcupa. Ne jũ wÿr quê ha jũ caxuw Pahpãm me pamã:

— Ca ijarkwa cunea kôt me apa, cwÿrjapê ri ihcunea na imã me apej pit, na wa ha itÿj ana amji capa — hajÿr nare. Ne por ihkàhhôc kam Pahpãm jarkwa ata, cute cumã mepaxũmre kên na me pajarên xà caxuw ri.

*Jeju te ri Hũm te me pahna amji caxàr na ton
Me Hàpên Xà 17.30-31; Roman 1.17; Pirip 3.7-9; Carati 2.15-21*

²¹ Ne ita kam, mõrmõ ca ha me anõ amji mã:

— Pÿhàpà, jũ mã wa ha ajte me, ne Pahpãm cuna mã meipej, quê me ina amji capa? — hane. He Pahpãm te ita caxuw ajteare mã me pamã, cute amji kam hapac xà intuw ita to hahkre, ne nee Mojxe xwÿ jõ kàhhôc kam Pahpãm te mam me to ihhimpej xà kôt me papa xà nare. Ne pé rÿ péa mã ramã Pahpãm jarkwa jõ kàhhôc kam, cute harkwa na mehcakôc catêjê te me ita jarên.

²² Ne Jeju Crixto pê ri curmã Pahpãm te amji kam hapac xà intuwti ata. Na quê ha jũm krã kèanre, ne ihkên ton jicu, ne Jejua toamji mã ihhimpej to ipa, quê ha Pahpãm cumã:

— Ate ikra to ihcunea na amji mã ahimpej, mã cute me ato amji kritxwÿ, cwÿrjapê ri imã ihcunea na me apej pit. Cwÿrjapê wa ha me ana amji capa, ne nee ate ito kên xà atajê to amji japackre, nehahpan xà na akên mã amên nare — hane. Ne Pahpãm te, mehcupa te Jeju Crixto to me amji kritxwÿ atajê cunea na, amji caxàr,

atajêpê me cupê Juta catêjê me, mehcahkritatajê. Ne cumã me ipipên pit, ne nee cumã jũm pê ajteare mã nare. Pahpãm mã mehcunea te, cute amji kam hapac xà to pit mã, amji mã mehhimpej na me to prãm.

²³ Ne mehcunea hõtpê mehkên ton to me ipa ita kam, quê ha nee me Pahpãm te me cumã cute amji kam hapac xà impejti tohũjahkre xà ata wÿr me cator, ne kam me hàhhuc nare.

²⁴ Mã quêt Pahpãm jàhcaprĩa na amjia kôt cute me pahte ame to kên itajê to tojnõ, ne hicu, ne me pahna amji caxàr, na cu hacpÿa mã meajpên to ikwÿ nõ. Ne ampo na ri cute me pahto hajÿr? Nee mã ampo na nare, Jeju Crixto te amji to me pahkritxwÿ, na ri cute Hũm te me pahna amjicaxàr na ton, mã cute me pahna amji caxàr, mã pea me pahkên catia pê me pahto cator.

Pahpãm te me pahkritxwÿ na me pamã Jeju xãm

²⁵ Mã Pahpãm te catyt kam ipa na me pahte me hahkre pej prãmte ri, cutepjê ita wÿr me pahwÿr ihkra pê Jeju kujahêc, mã iwryc. Ne cute amji tome pahkritxwÿ, ne me pahkên xà mã me paxàr xà atajê cunea mã cute amji jõr, ne pĩ kamihtyc. Ne pahte Jeju to me amji kwÿ xà ata pê ri, Pahpãm te ame pahto kên xà ata pê, me pahpytår xà. Naquê ha jũm te Jeju pê ihkritxwÿa toihkritxwÿ na amji mã to hajÿr na, quê ha nee ihkên xà kèanre ata mã hàr nare. Ne Pahpãm te, me cumã catyt kam ihkrĩ, ne impejti na amji jarên prãmte ri, cute me pahkritxwÿ na me pamã Jeju xãm. He pê mamPahpãm nee

cormã ne, cute ame to kên catêjê kam incryc tỳj to imprar pyrentu nare. Ne cama ahna me hamã, mār quê ihhêaj to xwỳ mã amjia kôtamehkên ton jicu, ne hỹrmã me apkjê.

²⁶ Ne ita caxuw Jeju cator xà ata me ajkaam, mã Pahpãm mã ihkôt mehcunea te mehkên jicu pyrentu na me to prãm, mār quê me ahna amji capa. He Jeju teamji to me pahkritxwỳ. Ne me pajahpan xà na ihtyc xà ata kôt, cu ha pahte cume mĩa mã me pahkên jicu, ne to amji mã me pahhimpej. Na quê ha Pahpãm pejti, ne catyt kam ihkrĩ ata, me pahna amji capa. Ita na quê ha pjê kam, mehcunea me Pahpãm te catyt kam ipa, ne catyt kam me pahtoimpejti na me hahkre pej.

²⁷ Cwỳrjapê cu ha nee me pahnõ amji to pajàmnan to:

— Ampo na ri Pahpãm te ina amji caxàr? He wa ite, cute ampo cunea na, cute me pamên atajê ton par, na ri cute ina amji caxàr — hajỹr nare. Ampo na? He me pahte ampeaj kam Jeju pê me pahkritxwỳ na amji mã me to hajỹr xà ata kôt, quê ha Pahpãm me pahna amji capa. Ne jũ wỳr cu me pahnõ pahcakôc xà to hane.

²⁸ He cu nee me pahnõ Pahpãm te me to ihhimpej xà cunea ton nare. Ampo na? He cu tee ramã ame ton to me hahkre ita kam, jũ wỳr quê Pahpãm mepahna amji capa. Ne quêt Jeju to amji mã me pahhimpej, mã cute amji to me pahkritxwỳ ata kôt ri, Pahpãm te me pahna amji caxàr.

²⁹ Mã ihtỳj Juta catêjê kwỳ kwỳa me hũjarên to:

— Nee me Pahpām pê mehcahkrit atajê Pām Catinare — hane. Ne cama amehhêj to me ipa. He Pahpām pê hanea ne, mehcahkrit Pām Cati, ne cupê me pahcuneaPām Cati.

³⁰ He Pahpām pyxit peaj, ne cute amji kam hapac xà pyxit peaj. Ne hanea ne, Jeju pyxit peaj to mehcunea te amji mã me hajÿr xà ata kôt, quê ha ihtÿj mehcunea na amji capa, ne amji wÿr me cupêJuta catêjê me, mehcahkrit atajê mea mã me to cuprô.

³¹ Na quê nee jÿm ihcakôc to:

— Mêr hõhõ, wa ha nee hipêr ihkàhhôc kam Pahpām te me to ihhimpej xà ata kôt ipa nare. Ampo na? He ramã Jeju te ite ampo ton xà itajê cuneaton par, ijaxà kam — hajÿr nare. He cu ramã Jeju to amji mã me pahhimpej, cwÿrjapê cu ha pahtÿj mehkàhhôc kam Pahpām te me to ihhimpej itajê, amji mã me hÿpahti to me kam pajapac pejti to me papa.

4

Pê Aprãw Pahpãm to amji mã ihhimpej, na pê ahna amjicapa

Carati 3.6-18

¹ Ne ita caxuw wa ha me amã me iquêt xwÿ pê Aprãw xwÿ kôt harê. Ne pê Pahpãm mã, cuna mã hÿmre ita pejti, ne catyt kam ajco ihkrî. Nejÿ mã mõrmõ pê ajte ne Pahpãm cuna mã impej ita hane? He xà pê ajkî Pahpãm ampo cunea na cumã harkwa atajê ton cwÿrjapê mã, pê ahnaamji capa? Hãpà!

² Quê hane na mã, quê ha ramã taa amji to hãmnan to:

— He wa amjia kôt ite ampo itajê cunea ton par, cwÿrjapê ri Pahpãm mã ipejti na, quê ha ihtÿj ina amji capa — hane.

³ He quê nee amji to hãmnan to hajÿr nare. Ata na pê Pahpãm jarkwa jõ kàhhôc kam ramã harê he:

“Pê nee Aprãw amjia kôt, hàpên xà to atajê kôt Pahpãm ahna amji caxàr nare.

Ne pê kypê Pahpãm to amji mã ihhimpej nare, na pê cumãimpej, pê ahna amji capa” hane.

⁴ Ne por jũm apê ata ri, ihtÿj hãm cwÿr xà. Ne jũ wÿr quê hõ pahhi amjia kôt cama cumã ampo gõ. Ne por cute hãm cwÿr xà ton ata, hõ tekjêa ri, ne nee mã amjia kôt hõ pahhi te cumã hõr nare.

⁵ Ne Pahpãm te nee hajÿr nare, ne quêt amjia kôt, cute amji kam hapac xàa na, ihtÿj cumã me pajàpên nare catêjê mã ampo gõ. Na cu ha Pahpãmmã me amji jarên to hane he:

— He wa tee ramã apu ate me ito ahimpej xà ita cunea kôt me ipa to me hahkre ita kam, jũ wÿr wa ha me to. Cwÿrjapê wa ha cama Jeju to amji mãme ihimpej, quê ha taa amji to me ikritxwÿ, ne taa me ijaxà kam ate me ito ahimpej xà itajê cunea ton to amã ipa — hane. Quê ha Pahpãm me pahto hÿjarên to hane he:

— Ate ikra to amji mã me ahimpej to hajÿr, cwÿrjapê ri imã me apej. Ne me apê catyt kam me apa catêjê, na wa ha itÿj me ana amji capa,

ne nee ate me ito kên jahpan xà na, me akên mã me amên nare — hane.

⁶ Ne pê ramã pahhi xwỳ pê Tawi atajũmjê jakryti na, Pahpãm jarkwa kôt, hõ kàhhôc kam, me ahna ihhôt to hane he:

⁷ “Jũ mã cu ha me, ne ame pajakry?

He pahte Pahpãm jarkwa jirô pê me pahpỳm, ne ihkaj na me pahkên xà ton, mã cute hicu, ne to tojnõ, ne ihhur, ata pyrên ri ame pajakry.

⁸ Por Pahhiti te pahte me ampo kên ton atajê kôt me pahkôt harên kêanre nare, ata pyrên ri ame pajakry” hane.

⁹ He xà ajkĩ me hakryti xà ita me cupê Juta catêjê te amji mã mempy kà jakep catêjê atajê mã pit mã? Hãpà! He hanea ne mehcahkrit atajê te amji mã me amjikà jakep nare atajê mã, ihtỳj me hakry xà ita. He wa ramã ite me amã Pahpãm jõ kàhhôc kam, cute Aprãw xwỳ to ihcakôc tõ hajỳr na, harên he:

“Pê nee Aprãw amjia kôt hàpên xà to atajê kôt, Pahpãm ahna amjicaxàr nare.

Ne pê kypê Pahpãm to amji mã ihhimpej nare, na pê cumã impej, pê ahna amji capa” hane.

¹⁰ Měr hõhõ, xà pê ajkĩ Aprãw xwỳ amji mã impy kà kwỳ jakep jakàn pê mã, pê harên to hane? Hãpà! He pê amji mã ihkà kwỳ jakepxwỳjrea na, pê Pahpãm cumã harkwa to hane.

11 Aprāw te amji mā ihkà kwỳ jakep xwỳjrea na, pê ramã Pahpãm ahna amji capa. Ampo na? He cute amji mā Pahpãm to hajÿr cwỳrjapê. Na ri cuteamji kà kwỳ jakep xà ata te ramã Pahpãm mā Aprāw xwỳ pejti na harën. Na pê Pahpãm cumã harkwa to:

“Ca ate kypê ito amji mā ahimpej nare, cwỳrjapê ri imã apê ihhêj rûm rỳ jũcaxuw jũm te ampo to ihcupan nare ata pyràac. Na wa ha itÿj ana amji capa” hane.

Ne pê ramã Pahpãm Aprāw te amji mā ihkà jakep xwỳjrea na, harën to hane. Cwỳrjapê ri Aprāw pê, por nee cute amji mā mehkà jakep nare, ne ihtÿj amji mā me Pahpãm to ihmipej atajê cunea xakat. MãPahpãm te atajê cunea na amji caxàr.

12 Ne hanea ne Aprāw pê, cute amji mā cuxà mehkà kwỳ jakep, ne Pahpãm to amji mā mehhimpej atajê cunea xakat. Ne xà ajkĩ cute amji mā ihkàjakep cwỳrjapê mā cupê me hakat? Hãpà! He Pahpãm to amji mā ihmipej cwỳrjapê ri cupê, por mehcunea Pahpãm to amji mā mehhimpej atajê xakat.

Jeju to amji mā pahhimpej xà ita kôt, cu ha me amcwa

13 Pê Pahpãm Aprāw mā pjê to hũjahkre to hane he:

— Ÿhÿ Aprāw, he pê ca nee ite me ato ihmipej xà cunea kôt apa nare cakrô, ca atÿj ate ito amji mā ahimpej, cwỳrjapê wa ite ana amji caxàr. Na wa ha amã pjê ita cunea gõ, mār ca me

atàmxwỳmea mã me to ahimpej — hane. Pê Aprãw kampa ne amji mã:

— Pỳhàpà, pom cormã ikra nare ita, mã ajte ramã me itàmxwỳ to Pahpãm te imã hũjarên. Wa itỳj cute imã hũjarên xà itajê na to amji mã hane — hane.

¹⁴ He pê nee Pahpãm Aprãw mã harkwa to:

— Ca ha xaa ite amã ihimpej xà itajê cunea to, ne ihkôt apa, wa ha cormã hahpan xà na, amã pjê ita cunea gô — hajÿr nare. Ne pê quêt Pahpãm cumã:

— Wa ha amjia kôt amã pjê ita gô. Ca ate, ite amãapê pjê ita jô pahhi na ato ijũjahkre xà ata na to, amji mã ahimpej, cwỳrjapê wa ha amã cugô — hane. Ne Pahpãm me pahto amji kam hapac to hanea, pom quê pê Aprãw to amji kampa he. Ne quêha me pamã ampo to awjahkre, cu ha cute ampo to hũjahkre xà ata na amji mã me to pahhimpej. Cwỳrjapê quê ha me pamã cugô. He pahte me Pahpãm te me pamã harkwa jirên xà ton ata kôt pit mã, me pamã cute to hũjahkre xà ata jôr nare. Quê hane na mã, cu mempar nare itakam, jũ wỳr cu ha me cupê cupy.

¹⁵ Ne quê ha jũm mã Mojxe xwỳ jô kàhhôc kam Pahpãm te me to ihhimpej xà jahkre pej cakrô, neeme ton nare, quê ha ihtỳj Pahpãm ahna kypê kam incryc nare. Quê Pahpãm jô kàhhôc kam, cute me to ihhimpej xà ita hamreare na mã, quê nee jũm hahkre pej, ne kam hapac nare ita kam, quê ha nee me cumã harkwa to:

— Ca ate ijarkwa jirô pê apỳm na ri me akam icryc — hajÿr nare.

Aprāw pē mehcunea te Pahpām to amji mā mehhimpej catêjê atajê xakat

¹⁶ Mēr hōhō, cu ha Aprāw xwỳ cuxà, me pahte Pahpām to amji mā me pahhimpej na, quê hame pamã ampo pej cunea jōr xà ata caxuw, pēAprāw mā cugō. Ne me pahte Mojxe xwỳ jō kàhhôc kam Pahpām te me pahto ihhimpej xà atajê cunea kôt me papa nare cakrô, quê ha Pahpām hâhcaprĩa kam ihtỳj me pamã ampo pej cunea gō. Ne mēr ampo na mā quê ha me pamã ampo pej itajê gō? Nee mā ampo na nare. He me papê Aprāwtàm xwỳa, ne me papê hūràac. Ampo na? He cu pahtỳj, cuxà Pahpām to amji mā me pahhimpej. Na ri Aprāw pē me pahcunea te Pahpām to amji mā me pahhimpej catêjê xakat, ne me papê mehtàm xwỳa pyràc.

¹⁷ Ne pē ramã Pahpām, hō kàhhôc kam cormã Aprāw ihkra nare kam to hūjarên to hane he:

“Imãa, ramã apê me hàhtôa pãm” hane.

Pê kampa neihtỳj amji mā me to hane, ne amji mã:

“He cormã ikra nare cakrô, mã ahnaa Pahpām te imã me itàm xwỳ jàhtôa to hūjahkre, na quê ha ihtỳj imã cugō.

Ampo na? He ihtỳj Pahpãm hâc pỹa mã mehtyc to ihtĩr.

Ne hanea ne ihtỳj harkwa kôt ampo amji to ita kam, quê ihtỳj cormã jũm kra nare ata mã ihtỳj ihtàm xwỳ gō.

Na wa itỳj amji mã to hane” hane.

18-19 Ne por pê Pahpãm Aprãw mã ihtàmwxwỳ jàhtôa ne to awjahkre ata caxuw, pê ramã ahna caku xěj, ne ramã ihweaj to ihwej. Ne amji mãa ramãcupê jũm tyc, ne cupê ihkra nare ata pyrãac, ne hanea ne hĩxi pê Xarakwỳj ata pê ihkre crà, ne ramã ihwejtu cakrô, mã ihtỳj Aprãw Pahpãm te cumã ampocunea to hũjahkre ata na hikaj. Ne cute ampeaj kam amji mã Pahpãm to ihhimpej, cwỳrjapê ri cupê mehcunea te Pahpãm to amji mã mehhimpej catêjê xakat. Na ri cute Aprãw cuxà Pahpãm to amji mã mehhimpej atajê pê ramã mehtàmwxwỳa pyrãc. Ne Pahpãm te cumã tohũjahkre xà ata, na ihtỳj cute cumã ton.

20 Ne nee Aprãw xwỳ te jũ caxuw Pahpãm to amji mã ihhimpej jicu nare, ne nee cuteampo to cumã hũjahkre xà atajê na to amji kam hapac to ipicokjêr to ipa to:

— Pỳpỹn, mõrmõ quê ha Pahpãm imã ikra nõ gõ, nare, quê ha nee imã ihnõ jõr nare — hajỳr nare. Cwỳrjapê ri Pahpãm te cute amji mã toihhimpej xà caxuw cumã carôt jõr, na ri Aprãw te Pahpãm pejti na harẽn to:

21 — Ampeaj kam apej, ne ate imã ampo to gũjahkre xà atajêjõr xà caxuw, ampeaj kam acarôt tỳj, cwỳrjapê wa itỳj ate imã hõr na amji mã ato hane — hane.

22 Pê Pahpãm mã, Aprãw te ihhêj ne nee ampo to ihcupan nare, ne catyt kam ipa, na pê hacpỹa mã to amji kwỳ, ne ahna amji capa. Ampo na? He Aprãw tePahpãm te ampo to cumã hũjahkre xà atajê na, ampeaj kam to amji mã ihhimpej na

pê. Ne pê Pahpãm jõ kàhhôc kam ramã ita na ihhôc to hane he:

“Ite Aprãw mã ampo to ijũjahkre, mã ihtÿj ijarkwa ita to amji mã ihhimpej. Cwÿrjapê ri imã cupê jũm te nee ampo to ihcupan nare ata, necatyt kam ipa.

Na wa ite hacpÿa mã to amji kwÿ, ne ahna amji caxàr” hane.

²³⁻²⁴ He Pahpãm te hõ kàhhôc kam Aprãw xwÿ to hũjarên xà ata, nee mãAprãw pit caxuw nare, ne me pahcunea caxuw pê harkwa ita to. Ne por Pahpãm carôt tÿjti te hacpÿa mã Jeju to ihtÿr ata, pahcunea te to amjimã me pahhimpej catêjê caxuw ri. He pahte Pahpãm to amji mã me pahhimpej, cwÿrjapê ri cumã me papê catyt kam me papa catêjê.

²⁵ Jeju te amji to me pahkritxwÿ, ne me pajaxà kam ihtyc xà mã amji jõr, me pahkên jahpan xà na. Mã Pahpãm te hacpÿa mãto ihtÿr, mãr quê me pahna amji capa, ne me pamã:

— Ate ikra tÿar pê me akritxwÿ ata to amji mã me ahimpej, cwÿrjapê ri imã me apê catyt kam me apa catêjê pit, na wa ha me ana amji capa — hajÿr.

5

Pahte amji pupun kèanre to me amji pupun xà kam mepajakry

Tijac 1.2-4

¹ Me pajõ Pahhiti pê Jeju Crixto te amji to me pahkritxwÿ, ne me pajaxà kam ihtyc. Na cu ita

kam, amcro ita kam, pahtỳj cute amji kam hapac xà ita na amji mã me to me pahhimpej. Cwỳrjapê ri Pahpãm te me pahna amji caxàr, ne hacpỹa mã hipêr me pahto amji kwỳ.

² Ne Jeju to pahte amji mã me pahhimpej xà ata kôt ri, cutea Pahpãm te amji kam hapac xà impejti ita na me panxôr. Cwỳrjapê cu mãnea mã, amjimã me to me pahhimpej ita na. Na quê ha jũ caxuw, amcro nō na, Pahpãm carôt jãhcujro ata to, me pahcunea to impejti ne. Ne me pampejti ata kam, quê ha mehcuneame papê Pahpãm pyràc, ne me pampejti na me pahpupu. Na wa me ijakry mea mã me amcro ita jikaj to me ipa.

³ Ne wa ha hanea ne me pahte me amji pupun xà kêanre xà kam, me ijakry pej pêa mã me ipa. Ampo na? He wa me pahte amji pupun xà kêanre xà ata pĩn, hacpỹ ne me pahwỳr ampo cunea na pahte me pajũcanãar kamamji mã me pahprĩa ne, me papa xà ata cator na, me imã hahkre pej.

⁴ Ne quê ha Pahpãm me pahte amji pupun xà kêanre ita kam, me pahte me pajũcanãar kam, amjimã pahprĩa na me pahpupu, ne me pamã harkwa to:

— Pom ate amji kam me gapac xà na, ite me apupun ita na ri imã me apej pit — hane. Cu ha me kampa, ne impar xà ita kôt, cu ha cormã cute me pamãampo pejti to hũjahkre xà ata na me hikaj.

⁵ He xà cu ha ajkĩ ihcaprỳ na, cormã Pahpãm te me pamã ampo to hũjahkre xà ata na me hikaj? Hãpà. He quê ha ihtỳj me pahwỳr cato.

Ampo na? Nee mã ampo na nare. He Pahpãm mã me pahkĩan to me pahkĩn. Cwỳrjapê ri cute me pamã Carõ Pejti kujahêc, mãr quê Carõ Pejti itacumã me pahcaxwãm pê me pahkĩnti na, to awjarê.

Pê me pancwỳrjapê Jeju ihtyc mã amji gõ

⁶ He ampeaj kam Pahpãm mã me pahkĩn, na pê cormã me pahkêanre xà ata kam, pê Jeju me pancwỳrjapê ty. Pê cu tee me pampejti na ame amji to hahkre to me papa xà ata kam ri, Jeju Crixto te amji to me pahkritxwỳ, ne me pahcunea kên jahpan xà na, me pajaxà kam ihtyc. Ne pê ramã Pahpãm mã, cute ihkra tyc na amji mã amcrohyr xà ata hahkre pej, na pê ahnaa hane.

⁷ Ca ha pijamã jũm te mehkwy jahpan xà na ihtycprãm ata na me acato? Quê! Ca ha ame hapêê ne ihhêaj tocormã jũm mã me acato. Ne ca atỳj ihhêaj to me jũm te ihnõ impejti cwỳrjapê ihtyc prãm ata mã me acato. Hamreare, jũ wỳr ca me jũm te ihnõ kêanre jahpan xà na, haxà kam ihtyc ihprãm ata na me acato.

⁸ He me pahcunea kêanre cakrô, mã Pahpãm mã me pahkĩan to me pahkĩn, na ri cute ihcãmter pê Jeju Crixto kujahêc, mã me pahcunea jaxà kam ihtyc.

⁹ Ne ita caxuw pĩ kam Jeju tyc xà ata kôt ri hacpỹa mã Pahpãm te mepahna amji caxàr. Cwỳrjapê cu ha me pa, me amji mã:

— He Jeju cukwa kam, quê ha Pahpãm nee cute ame pahkam incryc xà ata to ame pahkam incryc nare. Ne me pahcukij, ne me pahto

ipicokjêr xà jô amcrokam, cu ha quêt pahtÿj ame papa — hane.

¹⁰ He pê mam me papê Pahpâm curê xwÿn. Cakrô mã ihcãmter tyc xà ita kôt, cute hacpÿa mã me pahto amji kwÿ nō. Ne hamre, ita caxuw me papêPahpâm jô ikwÿ nō ita kam, cu ha me papê, pom Jeju tyc, ne hacpÿa mã ihtîr ata na cu ha me, ne me ty, ne hacpÿa mã me pahtîr, ne Pahpâmcahê na me pahtîr rohnÿtti mã na me papa.

¹¹ Jipy me pajō Pahhiti pê Jeju Crixto te hacpÿa mã me pahto Hÿm jô ikwÿ nō ita kam, cu ha me pajakrya to me pajakry.

Pê Atãw me pahcunea me pahkên mã me pamê

¹² Ne ca ihhêaj to me anōa amji cukij to:

— Jÿ rÿm mã ajte me pahkên xà ita cator? — hane. He nee jÿ rÿm cator nare, ne me pahcunea quêtiti pê Atãw xwÿ ata pê Pahpâm jarkwa jirô pê ihpÿm, ne cute pÿxô intête cumãn atakrêr. Cwÿrjapê ri mehkên ata pjê cunea kam ipicràn. Na cu me papê hÿràac, ne me pahcunea kêanre, cwÿrjapê cu ha me pahcunea me pahtyc pa.

¹³ Ne Pahpâm te Mojxe xwÿ mã cute me to ihhimpej xà cunea jarên. Mã cute ahna ihhóc xà ata cumam ri ramã mehcunea kêanre, ne ihtÿj cute me ampokên jahkre pej nare kam, me ton to me ipa. Mã Pahpâm te, cormã me cumã cute me to ihhimpej xà jôr nare ita kam, jÿ mã qué me cumãn to:

“Ate me ijarkwa jirô pê apÿm, na ri me acunea kêanre” hane.

Pê Crixto quêt me pahcunea me pampej mã me pajaxà

¹⁴⁻¹⁵ Ne Pahpãm te pĩxô intête Atãw mãn, mã cute ihkrêr, ne ramã me pahcunea kên mã me pamên, ne me pamã to hahkre. Ne me pahnõ te ihkôtpĩxô ata krêr nare cokrô, cu pahtỳj me pahte me pahtyc kam me pahtêm, ne me pahtyc to mõi. Ne me pahtyc to me pamõi itaa kam, mã ahnaa Mojxe xwỳjõ amcro kam hàhhuc. Ne Atãw pê me pahcunea mã me pahkên to hahkre jakàn pê mã ri Jeju Crixto cator, pjê wỳr. Pê cupê Atãw pyràac cokrô, cutenee me pamã ampo kên to hahkre nare, ne quêt me pamã ampo pej to pit mãhahkre, ne cute me pampej mã me pamên xà wỳr ri cator. Ne Atãw xwỳ te amji kam hapac xà kên ata kôt ri me hàhtõa ne mehtyc, ne mehtyctu. Ne Jeju Crixto teamji kam hapac xà pejti kôt ri, quêt nee jũm tyc nare. Ne Pahpãm te amji kam hapac xà pejti ata ri Atãw tekjê jirõa pê cati. Na quê ha me hàhtõa ne mehtyc xà pê me hũtã. Ne nee cute me hũtãr jahpan xà nahãhwỳr nare, ne cama me hũtãr to ipa.

¹⁶ Ne Atãw te ihkên xà ton ata kôt ri mehcunea te mehkên xà jãhtõa ne me ton. Mã Pahpãm me cumã:

— Imã me akêanre, na wa ha itỳj me acurê mã me amẽ — hane. Ne quêt Jeju te amjia kôt amji to me pahkritxwỳ, ne me pajahpan xà na ihtyc xà ata kôt ri, Pahpãm mã me pahcunea impej pit. Mã Pahpãm me pamã:

— Imã me apeaj, na wa ha me apej mã me amẽ — hane. Hõi, pê amjia kôt, cama me pamã pahte me hajỳr xà ita gõi.

Cu ha me Jeju kôt me ampo kên cunea tohjê

17 He ampeaj kam ri me hũmre pyxit peaj te ihkên xà ton ata jahpan xà na me hàhtôa ne mehtyc. Ne ita caxuw mam hũmre ata jirôa pê, hũmre nõ pyxit peaj pê Jeju ata te ri, quêt ampopej pit ton ata kôt ri me pahwÿr ampo pej pit japôj. Ne Pahpãm te me pahcunea mã cute amji kam hapac xà intuw jôr, cu pahte ahna me amji to pôj xà caxuw. Na cu ha me Jeju Crixto kôt me ampo kên cunea tohjê, ne pahtÿj catyt kam me papa.

18 Ne pom Atãw pyxit peaj te ihkên pyxit peaj ton xà ata to ri, cute me pahcunea curê mã me pamên. Ita na ri hanea ne Jeju pyxit peaj te ampo pejtipê catyt kam ata ton, ne cute to me pahtyc pê me pahcunea pytàr, mãr cu me Pahpãm cahê na me pahtîr rohnÿtti mã. Ne hanea ne me pamã cute amjikam hapac xà intuw jôr, mãr cu catyt kam ame papa, ne nee ame pahkên ton to prãm to ame papa nare.

19 Ne pom hũmre pyxit peaj pê Atãw xwÿ, nee-cute Pahpãm jarkwa par nare, ne hirô pêihpÿm, ne cute me pahte me pahkên ton to me pamã hahkre. Ita na ri Jeju pyxit peaj te Pahpãm jarkwa kam hapac, ne hacpÿa mã Pahpãm wÿr cute mepahto amji jaxàr, mã ihtÿj Hũm te me pahna amji caxàr.

20 Ne pê Pahpãm Mojxe xwÿ mã, cute me to ihmipej xà jarê, pê ahna ihkàhhôc to, mãr quê me cahyt, ne cute me ampo kên ton xà atajê na me amji jahkre pej. Ne ampeaj kam ri ampo kên jàhtôa to hàhtô, ne cati. Ne Pahpãm peaj to impej, ne hàhcaprĩ catia ita, ma cumã ipicamên

to mō, ne cati. Ne cute to kên itajê jakren tu, ne hirôa pê cati.

²¹ Na ri me pahkên xà pahtÿjti atajê cama me pahtyc xà mã me pagō, mã me pahcura ita kam, jũ kam cu me pahnō cupê tẽ. Mã Pahpãmjàhcajrën, ne hàhcaprĩa na ri catyt kam hãn ne me pamã cute amji kam hapac xà intuwti jōr to ipa, mār quê ihkôat me pahna amji capa. Ne mepajō Pahhiti pê Jeju Crixto ata kôt, cu ha hacpÿa mã me pahtír rohnÿtti mã na, cahê na amé papa.

6

Ihhêj ne ramã mam pahte amji kam me pajapac xà këntũm ata tyc

Carati 2.19-20; 5.24; Epet 4.17-24; 1 Petrô 4.1-6

¹ Pahpãm jàhcaprĩa na mã, cu pahte cuna mã me pahkên ton cacrô, mã ihtÿj cormã me pamã ampo pej pit ton to ipa. Na ri ramã mehcunea te me pahna Pahpãm jàhcaprĩa na me hõmpun itakam, xà cu ha ajkĩ mãnea mã me pahkên ton kam me to pancrà, mār quê Pahpãm te me pahcaprĩa na hipêr me hõmpu?

² Hãpà! Xà ca ha jũm tyc mã acakôc, quê ha ajkĩihtÿj akampa? Quê! He jũ wÿr quê akampa. Ne ramã me papê jũm tyc pyràac. Ampo na? He quê ha me pahcurê xwÿn pê Xatanaj te akên mã amên to prãmte awÿr tẽ, ne amã akên ton na awjahkre, ca ha apê mehtyac pyràc, ne nee kam gapac, ne cumã acakôc, ne ihkôt amji kam gapac, ne ampo kên ata ton nare. Ata pê ihhêj ne ramã me pahtyc, na quê nee hipêr jũm mepahte

ampo kên ton na me pah-ton nare. Cwÿrjapê cu nee hipêr amjia kôt me ampo kên ton nare.

Cô kam cute me pahcumrâr xà ata pê me pajapac xà kên jarêt xà pyrâc

³⁻⁵ He ramã me amã, ate mehajÿr xà na, me amji jahkre pej tu. Pê cu me pahkên ton jicu, ne Pahpãm wÿr me apkjê, ne me Jeju Crixto pê me pahkritxwÿ na ahna meamji capa, ne pea mehcunea mã to ajpê to harên to me papa, ita na pê cu me to prãm. Cwÿrjapê ri jÿm te mehcunea kam mare mã cô kam me pahcumrâr. Ne me pahna cô pijapÿn ata te ramã me pantête, pahte amji kam me pajapac xà kên tÿm cunea juwahi na harên. Ne huwahi xà ata pê ihhêj rÿm me pahte me pahkên jarêt xà ata, ne cupê cute me Jeju Crixto jÿ jarêt xà ata pyrâac. Ne me pahte me pahkên jarêt xà ita pê Jeju Crixto me ajpên kam me pahpyxit peaj. Na ri cô pê me pajapôj xà ata pê ihhêj rÿmcute me Jeju Crixto jarêt, mã hacpÿa mã ihtÿr, ne cator pyrâac. Ne pahte amji kam me pajapac xà to me papintuw, ne catyt kam me papa xà ita te ri ihcunea na me pajarên xà. Ne ramã Jeju Crixto kam mepahte me ajpên hõnco, mã ihtÿj pahte me pahkên ton xà nare na me pahtehcajpa, ne ihtÿj catyt kam me pahtehcajpar to ipa. Pê Pahpãm carôt tÿjti impejti to hacpÿa mã ihkra pê Jeju Crixto toihtÿr, na quê ha me pahtyc jirô pê mã, hacpÿa mã me pahto ihtÿr.

Xatanaj nee hipêr me pahto ihhimpej nare

⁶ Ne mam pahte amji kam me pajapac xà tÿm kên xakat pê Xatanaj pê me pajõ pahhi, na ri

ihtÿj me pahto ihhimpej, cu cumã me apê. Ne Jeju te pĩ kam ihtyc xà ata me ajkaam, pahte amji kam me pajapac xà tũm kên atato hamre, mâr quê Xatanaj nee hipêr me pahto ihhimpej nare. Cwÿrjapê quê hanee hipêr cupê me pajõ pahhi nare, cu ha me pa xwÿjê neehipêr cumã me pajâpên to mehprãm nare.

⁷ Ca ha ate atyc na, ca ha nee hipêr akên xà nõ ton nare. Ampo na? Jũ wÿr quê jũm ty, ne hipêr ampo kên to. Ne me pajaxà kam Jeju tyc ita kam, jũ wÿr quê jũm pê me pajõpahhi, ne hipêr me pahnõ te ampo kên ton na me pahto.

⁸ Ne ramã ihhêj ne Jeju Crixto kôt ame pahtyc ita kam ramã hacpÿamã ihkôt ame pahtĩr na pahte amji mã me to hajÿr.

⁹ Ne Pahpãm te hacpÿa mã Jeju Crixto to ihtĩr ita kam, jũũ caxuw hipêr ihtyc xà te to ihhimpej xà nare na, me pamã hahkre pej.

¹⁰ Ne me pahte me pahkên ton jahpan xà na ri ihtyc. Ne ihtyc pyxit peaj, na quê ha nee hipêr jũũ caxuw ihtyc nare. Ne ita caxuw Jeju ihtĩar na apu ipa, ne cama me pamã Hũm carõt tÿjti to ajpê, ne harkwa kôt ipa.

Cu ha nee hipêr me ampo kên ton to me papa nare

¹¹ Cwÿrjapê ca ha me amji jarên to hajÿr to me apa he:

— Ramã Jeju Crixto tyc, mã cute me harêt, ata kôt ri ramã cute pahte amji kam me pajapac xà tũm kên cunea jarêt. Cwÿrjapê cu ha nee hipêr pahte amji kam me pajapac xà kên ita kôt ame papa to prãm nare. Ne quêt Jeju Crixto kam me

pahte ajpënhônco, ne ajpën kam me pahpyxit peaj, ne cume mãã mã pahte Pahpãm cajpuaw xà caxuw ame pahtiar na ame papa — hane.

¹² Cwÿrjapê ca ha nee hipêr ate amji kam me gapac xà tũm ita to me amji mã me ahimpej nare, ne me ate amji mã ampo na prãm xà kêanre ata kôt ame apa nare.

¹³ Ne ca ha nee me anõ akên ton xà nõ mã acukrã xà nõ jahkre, quê ton nare. Ne Pahpãm mã, ca ha quêt me amji jôr to me apa. Ne Pahpãm te me atyc xà pê me apytâr, ne me amã me ate amji kam me gapac xà tuw jôr ata kam, ca ha atÿj cumã meamji jôr to me apa. Ne quê ha me ate catyt kam ampo pejti ton to me apa xà na, me atehcajpar to ipa.

¹⁴ Ne Pahpãm mã, ramã me apê catyt kam me apa catêjê, mã cute me ana amji caxâr. He xà ajkĩ me amã Pahpãm te me atoihhimpej xà jôr atajê cunea kôt hakop jahkre pej na mã, cute me ana amji caxâr? Hãpà! He amjia kôt, me akên xà kam, Pahpãm mã me acaprĩ, mã cute me ana amji caxâr. Cwÿrjapê ca ha nee hipêr amji na ate amji kam me gapac xà tũm kên jamãr, quê me ato ihhimpej nare.

Cu ha ampo pej ton to pit mã amji mã me pahhimpej to mepapa

Jowãw 8.34

¹⁵ Ne ca ihhêaj to me anõ amji jarën to:

— He nee mã pahte me Pahpãm te me pahto ihhimpej xà cunea kôt me hakopjahkre pej cwÿrjapê mã, cute amji wÿr me pahto ipipkjêr, ne me pahna amji caxâr nare, ne ihtÿj amjiakôt

cute me pahna amji caxàr. Cwÿrjapê wa itÿj Pahpãm jarkwa jirô pêipÿm prãm, ne itÿj hirô pê ipÿm — hane. Co he! Acakôc xà ita to hajÿr nare!

¹⁶ Ampo na? He ca ha me anô gô pahhi mã amji gô, hamre quê ha taa ato ihhimpej na, me amã hahkre pej pejtu. Ita kôpit na, ca ha me anô te akên mã amji jôr na, quê ha ihtÿj taa ato ihhimpej to ipa. Na quê ha gâpên xà ata jahpan xà na gâmcwÿr xà ata pê atyc xà. Nare, ca ha me anô tePahpãm mã amji jôr na, quê ha ihtÿj taa ato ihhimpej to ipa. Na quê ha cumã gâpên jahpan xà na ana amji capa, ne amji kôat ato, ca ha me atycxà jirô pê, hacpÿa mã atÿj me atÿr.

¹⁷ Na ca ha Pahpãm te me ato impejti xà ita pyrên me gakryti na cumã me amji jarê. Ne pê mam me ate amji kam me gapac xà tûm kêanre ata, pêajco me ato ihhimpej to ipa. Ne ita caxuw nee cute hajÿr nare, ne quêt Pahpãm te me amã ampo to hahkre atajê to, ca ha me gÿ cunea kam, me amãamji kÿan kam, amji mã me to ahimpej to me apa.

¹⁸ Quê ha pahhi kêanre te me pajàpên xà kam me pamãquêt ata te ihtyc, quê ha cute me harêt na, cu ha nee hipêr cumã me pajàpên to prãm nare. Ita jÿkjê na mã Pahpãm te pahteamji kam me pajapac xà kên tûm ata to hamre, na quê hahipêr me pahto ihhimpej nare. Cwÿrjapê cu ha pahtÿj ame papa, ne Pahpãm mã me apê.

Cu ha Pahpãm mã me amji jôr to me papa

¹⁹ He pê ca mam me akên xà atajê me, ahti na ate me axy kên to me apa xà tûmti atajêa

mã, ajco me amji jõr to me apa, ne amji mã me toahimpej to me apa. Ne ita caxuw, ca ha catyt kam, ampo pej tetetti to pit mã me gâpên to me apa xà caxuw, ca ha Pahpãm mã me amji jõr to me apa.

²⁰ Pê ca mam ajco me akên to pit mã, amji mã me ahimpej to me apa, nenee Pahpãm mã ampo na prãm̄ti atajê to me nare.

²¹ Ne mër ampo pej mã, ca ate amji kam me gapac xà kam me pahpahãm̄ti ata jahpan xà na ate me ipyr? Hamreare! Ne pom ate amji kam me gapac xàita pê ri me atyc xà.

²² Ne ramã Pahpãm te, ate me akên ton jicu xà caxuw me amã carôt jõr. Na ca haita caxuw cumã pit mã me gâpên to me apa. Cwÿrjapê ca ate Pahpãm mã ramã me amji jõr, ne me amji jõrtu, ne cutea ri catyt kam me apa na me aton, ne cupêa ri me gõ Pahhiti. Ne quê ha hacpÿa mã me ato me atÿr, ca ha me atÿr rohnÿtti mã na, cahê na ame apa.

²³ Mër hõhõ, me pahkên mã me pajàpên to me papa, mã cute me pamã hãmjõr xà ata pê me pahtyc xà. Ne Pahpãm nare, quêt cama cute mepamã pahtyc nare xà jõr ata pê ri hacpÿa mã cute me pahto me pahtÿr xà, cuha cahê na ame papa rohnÿtti mã. Na cu ha me pajõ Pahhiti pê Jeju Crixto kam me amji hõnco, quê ha ihtÿj me pamã jũ caxuw me pahtyc xà nare gõ.

7

Jeju te pahte amji kam me pajapac xà kên ata

pê me pahpytâr
Roman 10.4

¹ Ỡhỹ, Jeju kam me ikjêjê, he ca atỳj me acunea te, pom ite me amã cormã ampo jarên xà itajê kam me gapac to kênre nare. Ampo na? He meakwỳa kwỳ pê Juta catêjê, na ri me amã Pahpãm te Mojxe xwỳ mã, cuteme ato ihmipej xà juwahi ata cunea jahkre pej. Ỡhỹ, quê ha cormã jũm ihtĩar na ipa, quê ha ihtỳj Mojxe xwỳ jô kàhhôc kam, cute me hapackre xà ita jũm ata to ihmipej to ipa. Ne jũ caxuw ty, quê ha neehipêr Mojxe te me hapackre xà ita to ihmipej to ipa nare.

² Mêr hõhõ, quê ha pyjê nõ mã cormã impjê ihtĩar na ipa, quê hanee amji mã iràn xà na impjê nõ ton nare. Nãmri quê ha cute ihtyc na, quê haihtỳj me pancaca xà to pahte me amji pyrác xà ita to ihmipej to ipa jicu, ne ihtỳj jũm me hikwa na to tojnõ, quê ha cume hikwa.

³ Nãmri quê ha cormã impjê ihtĩar na ipa na, quê ha hĩxi te iràn xà na impjê nõ me hikwa na, quê ha me pancaca xà to pahte me amji pyrác xàata kôt cupê cahãj xyre ata, ne ihkêanre ne. Nãmri quê ha impjê cupê ty, quê ha hakàn pê impjê nõ me hikwa na, quê ha nee me pancaca xàa kôtcupê jũm cahãj xyre ata pyrác nare.

Cu ha ita caxuw Jeju pit mã me pajápên to me papa

⁴ Ne me ikjêjê, ate me hajỹar. Ampo na? He Jeju Crixto kam ate me ajpên hõnco ata kam, ihhêj ne ramã ihkôt me atyc. Na quê ha neeMojxe te me ato ihmipej xà ata hipêr me

ato ihhimpej nare. Ne hacpÿa mã Jeju Crixto ihtırna ri cupê me gō Pahhiti. Na ca ha atÿj cute me amã harkwa to ihcakôc xà itajê cunea na me kampa, ne me cumã apê. Ne por jũm cahãj pê impjêihtyc, mã hipêr hikwa tuw ata, quê ha nee hipêr impjê tyc ata kam hapac nare. Ne por impjên tuw me hikwa ata, quê ha amji caxuw kam hapac to ipa. Ita na ri me pahte amji kam me pajapac xà te hajÿar. Na cu ha mam pahte amji kam me pajapac xà wej tũmti ita jicu, quê ha nee hipêr me pahto ihhimpej nare, ne Jeju quê ha quêt me pahto ihhimpej to ipa.

⁵ Ne pê cormã me pahte amji kam me pajapac xà tũm ata me pahto ihhimpej reria mã, pê cu amjia kôt ajco pahte me amji mã ampo kên ton to prãmatajê ton to pit mã me papa. Ne pê Mojxe xwÿ jō kàhhôc kam, cute me hapackre xàajco ampo kên itajê ton tête mepamãn cakrô, pê cu pahtÿj ajco mãnea mã me ton to me papa. Cwÿrjapê ri me pahteampo kên kĩnti xà ata te me pahtyc xà mã me pajôr.

⁶ Ne hamre, ita caxuw cumam Mojxe xwÿ jō kàhhôc kam me pancaca xà ata cuneapê me pahcator. Ampo na? He ihhêj ne ramã ame pahtyc. Ne ita caxuw cu ha me Pahpãm tıar Carô Pejti ata kampa, ne ihkôat me papa, ne nee hipêr mepancaca xà tũm jō kàhhôc kam ihhêc ata to me amji japackre nare, ne pahtÿj ame papa.

⁷ Ne mōrmō ca ha me anō amji mã:

— He por Mojxe xwÿ jō kàhhôc kam, Pahpãm te me pahtoihhimpej xà wej ata pej nare — hajÿr na. Co he! Ca ha nee garkwa ita to acakôc to hajÿr nare. Ampo na? He cute me

pahto ihhimpej xà ata te ri, me pahte ampo to mehcupan xà atajê pupun na iton, cu pahte me hõmpun, ne me hahkre pej. Ne cute mepahto ihhimpej xà ata te hũjarên to hajÿr he:

— Ca ha nee amji jũ na ame ampo kĩn nare — hajÿr. Quêhũjarên to hajÿr nare na mã, wa ha hahkre pej nare kam, pa ramã amji mã:

— Wa itÿj me hũ na imã ampo kĩn, ata te nee ito ikên nare, ne cormãipeaj — hane.

⁸ Me ajkaam wa ijũpar pyrentu, ne tee ame amji jũ na ampo kĩn ita jicu to ame hahkre, ne jũ wÿr wa me hıcu. Ampo na? Ite amji kam ijapac xà tũm ita, ma ite me hũ na ampo kĩn ita na ito, ita kam jũ wÿr wa me hıcu. Ne Mojxe xwÿ jõ kàhhôc te riimã ikên ita to ipipê, wa ite hahkre pej. Quê ha Pahpãm nee me pamã Mojxe te me pajapackre xà jõr nare na mã, quê ha pahte amji kam me pajapac xà kên tũm ata nee me pahkên na me pahton nare.

Mojxe jõ kàhhôc ata ampÿare mã Pahpãm pê ame papana me pajarê

Roman 3.20; Carati 3.23-24

⁹⁻¹⁰ He pê wa icıre naa mã nee Mojxe jõ kàhhôc kamPahpãm te me pahto ihhimpej xà itajê impar, ne hahkre pej nare. He pê wa ajco ampo kên pit ton to ipa, ne nee kam imã amji kĩn nõ nare. Ne wa ite Mojxe jõ kàhhôc kam, cute me pahto ihhimpejxà itajê kam ijapac, ata caxuw wa ite ampo kên ton to ipa ita na amji pupun, ne ahna amji jahkre pej. Ne ihhêj rũm ipê mehtyc, ne imã amji kĩn nare. Ne cu ha catyt kam cute me pahto ihhimpejitajê kôt me hakop,

ne ihkôat me papa na mã, cu ha ramã me pamã amji kîn. Ne me pamã amji kîn xà kaj na, pom pahte amji kam me pajapac xà ata cama ajte me pahtyc xà wÿr me pajagã.

¹¹ He wa mam itÿj, pom Mojxe jô kàhhôc te ampo kên ton tète imãn atajê cunea ton to ipa. Mã ite amji kamijapac xà tùm kên ata pê imã ihhêj, ne imã:

— Gapacta ne ampo itajê cunea ton to apa, he nee akên nare, ne apeaj — hajÿr cakrô, pê cute ipej na ijarên xà ata kaj na, iteikên itajê ton to ipa itajê ityc xà mã igô. Na wa ihhêj ne ramã ityc.

¹² Cwÿrjapê cu me pahte Mojxe xwÿ jô kàhhôc tetetti, impejti ne ihcuhtacti na me hahkre pej, Pahpãm te ahna me pahto ihhimpej xàa na.

¹³ He xà ajkĩ Pahpãm te me pahto ihhimpej xà impejti ita mã me pamã amji kîn nare na me pahto, ne me pahtyc xà wÿr me pajagã? Hãpã. Hepahte amji kam me pajapac xà tùm kêanre atajêa te, Pahpãm te me pahto ihhimpej xà impejti atajê kôt, me pamã amji kîn nare name pahto, ne me pahtyc xà wÿr me pajagã. Pê wa mam ikên xà ton to ipa atajê te cama ikên mã irên to môr na hahkre pej. Na pê wa amji mã:

— Wa ite Pahpãm te intête me cumãn xà kam ijapac, ne ite ampo kêanre itajê ton na amji jahkre pej. Ne ita caxuw ite mam ite amji kam ijapacxà tùm ita kêanre na hahkre pej, ne hõmpun — hane.

Pê cu mam cormã amji mã me ampo kên capi

¹⁴ Ne Pahpãm Carõ Pejti pĩn ri Mojxe jõ kàhhòc kam, cute me pahto ihhimpej xà atajê cator. Ne Carõ Pejti ita te ri catyt kamharkwa kòt me papa xà caxuw, me pamã caròt jòr. Ne pa nare. Ihkĩn te ipê hũmre, ne icaròt peacre, na wa ite amji kam ijapac xà tũm kėanreitajê kòt ampo kėn cunea ton to ipa.

¹⁵ He wa nee ajte pa icaca xà te ajpẽn jĩkjėhti ita na amji jahkre pej nare, ne hãn ne ikrã acto tu. He xà wa ha ite itỳj imã ampo ton prãmti atajê to? Hãpà! Wa nee ton nare. Ne ajte imã ampo ton prãm nare, ne imã ihkĩn nare atajê, wa itỳj to.

¹⁶ Ne nee wa ajte ampo pejti ton to amji kam ijapac to ipa nare, ne tee intėte amji mãn to:

— Wa ha nee hipêr ampo kėn ata ton nare — hajỳr cakrò, itỳj to, me ajkaammã Pahpãm te me pahto ihhimpej xà, ikėanre na ijarê. Ne ampeaj kam ri cute ijarėn na imã hahkre pej.

¹⁷ Wa nee ikėn xà ton xà itajê intėte amji jipròn nare na, ramã imãamji jahkre pej. Ne icaxwãm pė icaca xà kėanre itajê xakat ri hãn ne, iteampo kėanre ton xà itajê na imã awjahkre, wa hãn ne to.

¹⁸ He ite amji kam ijapac xà tũmti ita kam, nee imã ampo pejti ton xà hamreare. Ampo na? He wa te apu ampo pejti ton na amji to prãm cakrò, wa nee ajte amji mã hamãr ne ton nare.

¹⁹ He ampo pejti atajê ri imã ton prãm cakrò, wa nee ajte ton nare. Ne ampo kėanre itajê ri imã ton prãm nare cakrò, wa itỳj to.

²⁰ He wa nee amjia kòt ampo kėn ton nare, ne ite amji kam ijapac xà tũmti ata ri, ite ampo

kên ton na imã awjahkre, wa ajte nee intête amjijiprôn nare ne itÿj to.

²¹ Hôhō, pê wa mam hane he, pê wa ajco ite ampo pejti ton xà caxuw amji mã capi cakrô, nee ajte ton nare, ne cama amji mã ampo kên pit capi.

²² He ite amji kam ijapac xà impejti kam ri, Pahpãm te me pahto ihhimpej xà kam ijapac pejti xàatajê pyrên ri, icaxwãm pê ijakry.

²³ Cakrô pê wa nee ajte kam ijapac ne ihkôat ipa nare, ne ajco ampo kên pit ton to ipa. Cwÿrjapê ri ite amji kam ijapac xà ita tuwpejti me, ite amji kam ijapac xà tũm kêanre itaihêj ne ihtÿj apu ajpu. Ne ite ampo kên tonto ipa ita pê ihêj rũm, me hacjên xà pê icator xà nare ata.

²⁴⁻²⁵ Ne wa icaxwãm pê itÿj Pahpãm te amji kam hapac xà kôt ampo pej pit ton to prãm cakrô, mã ite amjiton xà itajê kôt hamreare. Pê wa ajco ampo kêanre atajê ton to ipa intête, nee ajte amji jiprôn nare. Ne pê imã amji kãn nare, pê wa pa amji mã:

— Jũm mã quê ha ajte ite ampo kên ton xà itajê te, ityc mã ijôr xà ata pê ipytà? — hane. Nee mã jũm nare. He me pajô Pahhiti pê Jeju Crixto te ri ampo kên cati ita cunea pê ipytàr!

8

Quê ha Pahpãm Carō Pejti me pahtĩr ita na me pahtoipa

Carati 5.16-26

¹⁻² Hamre, ita caxuw quê ha, por Jeju Crixto kam me ajpên hõnco to me ipaatajê, quê ha

nee Pahpām jūm curê mā mēn nare. Ampo na? He Pahpām Carō Pejti ita te ri Jeju Crixto kam pahte me ajpēn hōnco na me pahton, ne mepamā pahte amji kam me pajapac xà intuw pejti ita jōr. Me ajkaam, cute mam me pahte amji kam me pajapac xà kēn tūmti ata te, me pahto ihhimpej xà pēme pahto cator. Na cu ha nee Pahpām kaj na, ampŷa mā cupê ame papa, ne ihkēn catia ata mā me pancjēj nare.

Quê ha nee hipêr pahte ampo kēn ton xà atajê mepahto ihhimpej nare

³⁻⁴ Ne pê Pahpām Mojxe xwŷ mā cute me to ihhimpej xà gō atajê cunea imej pit. Cu nee mempar nare. Ampo na? Jū wŷr cu apu amji mā me hamā, neme kampa. Cwŷrjapê ri Pahpām te me pahna amji ton to:

— Tee ame ite me to ihimpej xà ton to me hahkre ita kam, quê ha nee curê mā cute me mēn xà ata pê me amji pytār nare. Cwŷrjapê wa ha mehŷŷrikra kujate, quê ha mehkritxwŷ na amji to, ne taa mehkēn xà ita pê me hŷtā — hajŷr. Ne ma cute me pahwŷr Jeju kujahêc, mā cute me hŷmrea naamji ton, ne ita ri pjē kam apu ipa. Ne ihtŷj Hŷm te, Mojxe xwŷ mā cute me to ihhimpej xà atajê na, me pajaxà kam amji mā impar kēn to ipa nare. Jicu xà kam, nee ampo cwŷrjapê ihtŷc prām nare kam, cupê me pahkritxwŷ te hajŷr romā mā, cama cute amji na me hamār, mā cute me pajaxà kam mehcuran, mā ihtŷc. Ata to ri cute me pahkēn xà catia ata pê me pahpytār. Ne cute me pamā carôt jōr na, cu pahte amji kam me pajapacxà kēn tŷm ata kôt me papa jicu, ne

pahte amji kam me pajapac xà tuw pejti, Pahpām Carō Pejti pīn ajpēn cator ata kôt, cu me papa.

⁵ Ne por mam cute amji kam hapac xà tūm me to ihhimpej to ipa atajêa kôt me ipa. Ne Pahpām Carō Pejti quêt me to ihhimpej to ipa atajê ri, ihkôat me ipa.

⁶ Ne quê ha jūm te, cute amji kam hapac xà tūm ata kôt ipa na, quê ha ihtÿj jū caxuw ty, ne ihtyc tu. Ne quê ha quêt jūm te PahpāmCarō Pejti kôt ipa na, quê ha nee cumã ampo cupa nare, ne ihtÿj ihcarīcti kam, ihtīar na ipa rohnÿtti mǎ.

⁷ Ne por jūm cute amji kam hapac xà tūam kôt ipa ata pê Pahpām curê xwÿn. Ampo na? He hūpar nare, na ri nee Pahpām te to ihhimpej xà ata kam hapac nare. Ita kam tee apu ihkôt amji ton to hahkre, ne jū wÿr quêapu amji mǎ hamã ne to.

⁸ Ne por amjia kôt cute amji kam me hapac xà tūam kôt me ipa atajê ri, nee me Pahpām cajpuaw nare.

Pahpām Carō Pejti ri, me pahcaxwÿn me, me pajī tīrrohnÿtti mǎ na to

Carati 4.1-7

⁹ Quê ha Pahpām Carō Pejti te nee me akam ihkrī nare na, ca ha nee me apêhō tekjê nare. Na ca ha nee mam, ate amji kam me gapac xà tūm ata kôt me apa nare, ne quêt Carō Pejti jarkwa kôt me apa, mǎr quê me akam ihkrī.

¹⁰ Ne quê ha Jezu Crixto, Carō Pejti kôt, me akam ihkrī cakrô, quê ha ihtÿjjū caxuw me gī apu ty, me ate Pahpām te me ato ihhimpej xà atajê jirô pê me apÿpÿm cwÿrjapê. Ne me

acaxwỳn nare, quê ha ihtỳj ihtĩr rohnỳttimã. Ampo na? He ihtỳj Pahpãm te me ana amji caxàr.

¹¹ Pê Pahpãm Carõ Pejti hacpỹa mã Jeju Crixto to ihtĩr, ata ri me akam ihkrĩ. Ne taa mã quê ha hacpỹa mã, me amã me gĩ to ihtĩr.

¹² Ita kam me ikjêjê, cu ha nee me pahte amji kam me pajapac xà tũam ata kôt me papa nare.

¹³ Nãmri ca ha me ate amji kam me gapac xà tũam kôt ame apa na, ca ha ramãme atyc xà wỳr ame pra. Ne ca ha me ate Pahpãm Carõ Pejti carôt kôt me akên ton jicu na, ca ha Pahpãm cahê na me atĩr rohnỳtti mã na, me apa. Ne nee jũ caxuw me akên catia pê, cuhy cati ata wỳr me aprar, ne kam me apỳpỳm nare.

Pahpãm Carõ Pejti ri, ihkra na me pahto

¹⁴ Ne por Pahpãm Carõ Pejti amji kôt me to ipa atajê cunea pê mehkraa to mehkra.

¹⁵ Měr ampo na mã Pahpãm te me amã Carõ Pejti jõr? Xà ajkĩ ate cama me cumã gápên xà caxuw, nare, ajkĩ cute me gigêc rên xà caxuw mã? Hãpà. He cute me ato ihkra xà caxuw ri, cute meamã Carõ Pejti ita jõr. Na ca ha atỳj Carõ Pejti carôt kôt cumã:

— Inxũ — hane.

¹⁶ Pahpãm Carõ Pejti me, me pahcaxwỳn ajkam ihhõnco, ne me pamã:

— Me apê Apãm Cati kraa to ihkra — hane.

Cu ha jũ caxuw, Jeju me, me ajpêan, ne me pampejti ne

1 Petrô 1.3-9

¹⁷ Ne pom hãn ne me hũmjê tycjakàn pê, mehkra te me hàhcukrêj cwỳr xà, ita kôpit na

mã, cu ha Jeju Crixtõmea mã, Hũm te cumã ampo jõr xà to hũjahkre atajê cwa. Cu ha Jeju Crixtõ me, me pahcunea te cute amji pupun xà kêanre atajê na ihkõt me amji pupun na, cu ha hanea ne jũ caxuw, Jejua kõt me pahcarõt tÿjti, capẽnti, impejti kam ame papa.

¹⁸ Ne wa pjê ita kam, pahte me amji pupun xà kêanre kênre atajê to amjikampa, ne hanea ne ampo pejti to me pajãmcwÿr xà atajê me to ajpẽn mã hapyre mã. Ne pahte ampo pejti to me pajãmcwÿr xà ata ri, pahte me amji pupun xà kêanre atajê jirõa pê catiato cati. Ne pahte me ampo pejti to me pajãmcwÿr xà ata kam, cu ha nee hipêr ampo kên itajê to me amji japackre nare.

¹⁹ Ne pê Pahpãm pjê kam ampo cunea to, itajê pê me hũmre me, pryre me, ampo jara me, tep me, ampo cunea. Quê ha ampo itajê cunea ihtÿjjũ caxuw, Pahpãm te me pahto ipipẽ xà ata kam, mepapê ihkra na cute me pahpupun na, me pajikaj.

Quê ha jũ caxuw Pahpãm ampo cunea to impej

²⁰ Ne mêr ampo na mã ame amcro ata jikaj? Nee mã ampo na ame amcro ata jikaj nare. He pêmam Atãw xwÿ Pahpãm cuna mã ihkên xà to, na ri ihkõt ampo cunea kên mãhàr. Ne nee mã amjia kõt ihkên mã hàr nare. Ampo na? Pê Pahpãm ramã cute ita ton xà to amji kampa.

²¹ Ne quê ha ihtÿj jũ caxuw amcro ata na, Pahpãm te ampo cunea ton atajê hacpÿa mã impej pa. Ne cute me pahto ihkra ita kam, quê ha hacpÿamã me pahto impej pa. Me ajkaam,

quê ha hanea ne cute ampo cunea ton itajê impej partu, quê ha nee hipêr ihcacu, ne ihkên nare.

²² Ne me pamã, pjê kam ampo cunea kàj xà, mã amrã na, hahkre pej. Ata pê ihhêj rûm pyjê mã mehkra xà, mã me ihcajpê ita na mãampo cunea kàj xà.

Cu cormã Pahpãm te me pamã me pajĩ to ipintuw xà ata jikaj

²³ Ne pê Pahpãm mam me pamã Carõ Pejti jôr cacrô, mã cormã me pahkàj xà, cu me amrã, pahte amji to me papintuw xà jikaj xà cahhur to, pahte me hikaj xà ita kam.

²⁴⁻²⁵ Ne cu me pahte amji mã me Pahpãm to hajÿr, ne amji mã me pahprĩa kam me hikaj, ne me amji mã:

— Wa nee cormã ite me, por wa me hikaj ata pupun nare cacrô, wa itÿj Pahpãm te ampo cunea to impej, ne imã ijĩ to ipintuw na amji mã me to hane. Cwÿrjapê, wa ha itÿj me hikaj — hane.

Carõ Pejti Pahpãm mã me pahcakôc na me pahtehcajpa

Epet 1.3-5

²⁶ Ne jũ caxuw, pahte me hikaj to hicu prãm xà ata kam, quê ha PahpãmCarõ Pejti pahte me hikaj jicu nare na me pahtehcajpa. He me papê Pahpãm mã amji cajrên jahkre kêatre, cwÿrjapê quê ha Carõ Pejti ihtÿj ihcakôc nare kamihcarĩcti kam, aracri Pahpãm mã me pahcajrên.

²⁷ He Pahpãm te me pahcaxwãm pê me pahte amji kam me pajapac xà pupun pejtu. Ne hanea ne cumã Carõ Pejti te amji kam hapac xà jahkre

pej. Quê haCarõ Pejti Pahpãm te me pamã ampo jõr to prãm xà ata na, quê ha me pamã ahwỳ.

²⁸ Me pamã, mehcunea mã Pahpãm kĩnti, mã cute amji kam hapac xà mã me hacjên xà caxuw ri, amji mã me capi atajê wỳr ampo kên teimprar, ne ame to jũ mãn xà atajê pĩn impejti te amji to ipixô, ne me hỳrmã imprar na, me pamã hahkre pej.

Jeju pê me Pahhàkà cati

²⁹ Ne Pahpãm te amji mã me pahcapi, ne taa amji mã:

— Pom itajê quê ha me cupê ikra pê mehtõ kà pê Jejupyraac, na quê ha me to “Thàkà” — hane.

³⁰ Ne pê Pahpãm ramã me pahto amji kam hapac xà to amji kampa ata to ri, me pahto amji kampa. Ne hanea ne cute amji mã me pahcapi. Ne hanea ne cute catyt kam me papa catêjê na amjicaxàr, ne quê ha hanea ne me pamã me pahcarôt tỳjti, impejti, capëntigõ, cu ha me papê hũràac ne kam me papa.

Quê ha nee me pahcurê xwỳn ame pahto jũ mãn nare

Roman 5.1

³¹ Ne pom Pahpãm te me pamã ampo pejti cunea jõr itajê kôt ri, ramã me pamã Pahpãm pê me pajamãr catê na hahkre pej. Heramã Pahpãm me pahcahê na ipa ita kam, xà quê ha ajkĩ ihtỳj ampo me pahtohjê? Hãpà!

³² Ne hanea ne me pajaxà kam, ihkra tyc xà caxuw, cute hõr to xuwca nare, ne ihtỳj ihtyc mã hõr ata kam, xà quê ha ajkĩ nee me pamã

ihkôtampo pejti itajê nõ jõr nare? Hãpà, quê ha ihtỳj me pamã cugõ!

Jũ wỳr quê pahte ampo kên ton itajê, cupêcumã me pahkĩnti ita cahpêrta

³³ Ne Pahpãm te ri ramã me pahto hũjarên to:

— He imãa, pom itajê pê catyt kam me ipa catêjê, na wa ha me ahna amji capa — hajỳr xà ata kam, jũm quê ampo kên na me pajarê?

³⁴ He me pajõ Pahhiti pê Jeju Crixto ramã me pajaxà kam ihtyc, ne ihtyc xà ata jipy, ramã hacpỹa mã ihtĩr, ne ma Pahpãm jĩkjêrũm awpôc rũm, me to ihhimpej xà krĩ xà kam jỹ, ne cumã me pahcajrên to ihkrĩ. Ata kam, jũ mã quêha ajte jũmjê me papê ampo kên ton catêjê na me pamãhacjê? Quê, hamreare!

Jũ wỳr quê ampo kên Pahpãm pê cumã me pahkĩnti ita cahpêrta

³⁵ Me pajõ Pahhiti pê Crixto mã me pahkĩan to me pahkĩn.

Ne ampo quê cumã mepahkĩnti ita tête ihcahpêrta, quê hicu?

Hamreare, wỳr quê ampo ihcahpêrta!

Cu ha me amji pupun xà kêanre to me amji pupu, quê ha cormãcumã me pahkĩn ita na.

Ne quê ihhêaj to ampo te me pahto jũ mãn xà ata kam, quê ha cormã cumã me pahkĩn ita na.

Me papê Pahpãm tekjêcwỳrjapê ri Pahpãm curê xwỳn te ame pahto kêanre ata kam, quê ha cormã cumã me pahkĩn ita na.

Quê ha ampeaj kam me pamã prãm cakrô, quê ha cormã cumã me pahkĩn ita na.

Quê ha me papê hamreare cakrô, quê ha cormã cumã me pahkĩn ita na.

Quê ha jũmjê ame pahcuran prãm toame ipa cakrô, quê ha cormã cumã me pahkĩn ita na.

Ne jũm me pahcuran cakrô, quê ha cormã cumã me pahkĩn.

³⁶ Ne pê ramã rỳ pêa mã Tawi xwỳ Pahpãm jõ kàhhôc kam me pahto hũjarẽn to:

“Me ijõ Inxũ Cati, he acurê xwỳn acwỳrjapê amcro cunea kam me icuran to prãm.

Ne me ito ihhêj rũm carà cahàcre hòhti curan xà caxuw, ne ihtỳj me icuran prãm” hane.

³⁷ Ne xà cu ha ajkĩ ampo kên itajê cunea cupate me pajõ Pahhiti mã me pahkĩnti xà ata to, amji mã me pahhimpej jicu? Hãpà, nee cu amjimã me to pahhimpej jicu nare! He taa mã quêha quêt me pahte ampo cunea tohjê na me pahto!

Ampo quê Pahpãm pê cumã me pahkĩnti ita cahpêrta

³⁸ Ne nee ampo te Pahpãm mã me pahkĩnti xà ita cahpêrhyr xà nare na, me pamã hahkre pej.

Cu ha me pampeaj na me papa, nare, cu hame ty, quê ha cormã Pahpãm mã me pahkĩn.

Quê ha ampo carõ me, cupê jarôti me, me hõpahhi kwỳ atajê nee me Pahpãm mã me pahkĩnti ita têtete mehcahpêrhyr nare.

Ne pom amcro ita kam ampo cator ata me, nare, quê ha jũa caxuw, cormã ampocato ata,

quê ha nee Pahpãm mã me pahkĩnti ita tète ihcahpêrhyr nare.

³⁹ Quê nee cõjkwa me pjê krac ri jũa rũm, ampo cator itajê nõ Pahpãm mã me pahkĩnti ita tète ihcahpêrhyr nare.

He nee ampo te Pahpãm mã mepahkĩnti xà ata tète ihcahpêrhyr xà hamreare.

Cu Jeju Crixto pê me pajõ Pahhiti kam pahte me ajpẽn hõnco cwyrjapê, quê ha Pahpãm mã mepahkĩn rohnýtti mã.

9

Pê Pahpãm Juta catêjê mã ampo pej jàhtõa ne cugõ

Roman 3.1-2

¹ Ita caxuw wa ha me amã, me ikwý pê Juta catêjê pê Ixaher catêjê to, ite amji cajpêrxà na amji jarê. Wa Jeju Crixto kam ite amji hõnco ita kam, wa nee PahpãmCarõ Pejti kõt ame amã ihêj nare, ne quêt ampeaj kam me amã harê. Ne hanea ne icaxwãm pê imã, wa ampeaj kam ame amã amji jarên na, imã amji jahkre pej.

² He me ikwý pê Juta catêjê pê me ikwýa kwý, ne nee Jeju to amji mã mehhimpej prãm nare ita kam ri, me hũ na ipeacre, ne imã amji kĩn nare.

³ Ita kam wa itýj, pa mencwyrjapê Pahpãm te icurêmã imên ne ito kèanre na, amji toprãm. Ne hanea ne Jeju Crixto kam ite amji hõncoxà ita pê icapa, ne ampýamã Pahpãm pê ixãm, quê ijaxà kam me hàhhuc, nemempej mã me hàr na, imã me to prãm cakrô, mã nee Pahpãm te me to hajýr nare.

⁴ Ýhỹ, por me ikwỳ pê Juta catêjê atajê ajteare mã me, ne quêt me ipihho te hajÿr he. Pê ramã Pahpãm me to hõ tekjê xà caxuw amji mãme capi, ne me to amji kra, ne me cumãa Carôt jàhcujrohti impejti ata to ajpê. Pê hanea quêt Pahpãm ajco Ixaher catêjê mãa amji jarẽ, pê me kampa, ne me ajpẽn pa, ne hanea ne me cumã ihhimpej xà gõ. Ne pê hanea ne Pahpãm me cumã, cute me to amji kam hapac xà to impejti xà to hahkre, ne quêt me cumãa ampo pej jàhtëa to awjahkre.

⁵ Ne menquêtjê xakat pê ihtÿj Pahpãm kôt me ipa, atajê pê Aprãw xwỳ me, Ixac xwỳ me, Jaco xwỳ pê Ixaher catêjê xakat. Na ri me ikwỳ pê Juta catêjê pê mehtãmwxwỳa to mehtãmwxwỳ. Jirõa pê ri Jeju Crixto pê Pahpãm kra te mehĩa na amji ton, ne cupê mehkwyã nõ. Na cu hame cumã, Pahpãm pê ri pjê cunea to ihhimpej catêna to pajàmnan to me papa. Ampeaj kam!

Pê Pahpãm harkwa to ihcakôc ata na ihtÿj cute amjipar

Roman 2.25-29

⁶ Mër hõhõ, Pahpãm te Juta catêjê to kênre nare, ne me to hõ tekjê. Mã cute me cumã me to Inxũ Cati na amji to hũjahkre xà ata na, nee ajte mehcunea mãihkĩn, mã ihkôt me ipa nare. Ne hõtpê mencrene ihkôt me ipa. Ita kam, xàajkĩ Pahpãm te nee me cumã amji ton xà ata na amji par nare? Hãpà! He ihtÿj cute harkwa to ihcakôc xà atana, cute amji par. Ne mër ampo na mã neemehcunea pê Pahpãm tekjê nare? Nee mã ampo na nare. He Pahpãm te nee amji mã

mehcunea capi nare, ne hōtpê me pyxitre ne amji mǎ me capi.

⁷ Ne nee mǎ Aprǎw tǎmxwỳ kwỳ cunea pê Pahpǎm tekjê nare. Ne mehkwyà kwỳ pê hōtpê Pahpǎm tekjê. Ampo na? He pê Pahpǎm Aprǎw xwỳ mǎ:

“He pê akra pê Ixac tǎmxwỳ tǎmxwỳ kwỳ pê itekjêa to itekjê.

Ne mehkĩnte akra nō pê Ixamar tǎmxwỳ tǎmxwỳ kwỳ pê, nee itekjê nare” hane.

⁸ Cwỳrjapê ri Pahpǎm te amji mǎ Aprǎw tǎmxwỳ tǎmxwỳ kwỳ capi na, cute amji to hũjahkre xà atana. Cute amji mǎ me capi atajê pê ri hōtekjêa to hō tekjê. Ne cute amji mǎ mehkwy capi nare, ne amji to hũjahkre nare atajêpê ri, nee me hō tekjê nare.

⁹ Ne pê Pahpǎm Aprǎw xwỳ mǎ ihkra xũmre to hũjahkre to hane he:

“Wa ha jũ caxuw hacpỹ ne me awỳr amji jaxà, quê ha Xarakwỳj pê gĩxi mǎ ihkra xũmre nō ihpỳm” hane.

¹⁰ Hanea na pê Xara mǎ ihkra xũmre pê Ixacita ihpỳm, ne ihkà. Ne apuipa, ne Repecakwỳj me hikwa tuw, ne kam ihkra xũmre cumǎ ajkrut hiahpuro ne ihpỳm. Ne mam ita japrỳ te Exaw, ne hapu na ita japrỳ te riJaco pê Ixaher catêjê quêtiti, ne cupê me Juta catêjê xakat.

¹¹⁻¹² Pê Pahpǎm Repecakwỳj mǎ:

“Pom hapu na akra xǔmre pǔm ita pê quêha mam ita jǒ pahhi” hane.

Ne pê cormã ihtua kam ajwar me harij, ne nee cormã me ampo kên me, impej nō ton, pê ahna me hōmpun nare cakrô, mã Pahpãm te amjia kôt, amji mãihnō ita capi, ne ma apu ihnō ita caca.

¹³ Ne pê ramã Pahpãm, hō kàhhôc kam, me ahna amji jarěn to hane he:

“Jaco ri imã ihkîn, ne Exaw ri imã kîn nare” hane.

Hō, pê cormã ajwar mehpǔm nare kam, pê Pahpãm me ahna amji jarěn to hane, ne pyxit ne amji mã capi.

Quê ha Pahpãm mã jǔm caprĩ to prãm na, quê haihtǔj caprĩ

Roman 3.5-8

¹⁴ Ne cu ihhêaj to me pahnō amji mã me pajarkwa to:

— He Pahpãm te amjia kôt amji mã jǔm capi, ne ma apu ihnō ita caca ita kam, imã Pahpãm ita nee catyt kam ipa nare — hajǔr nare. He Pahpãm pejti, ne quêt catyt kam ipa.

¹⁵ Na pê rǔ pêa mã Mojxe xwǔ mã amji jarěn to hane he:

“Quê ha imã jǔm caprĩ to prãm na, wa ha itǔj caprĩ.

Nãmri quê ha imã jǔm caprĩ prãm nare na, wa ha nee jǔm caprĩ nare” hane.

16 Pahpām te ihtỳj mehkwȳ na amji caxàr, ne ma amehkwỳ caca. He xà ajkĩ me hàpên xà to me hàpên to ipa atajê kôt mã, Pahpām te me ahnaamji caxàr? Nare, xà ajkĩ hũmre ata mã, Pahpām te ahna amji caxàr na to prãm na mã, cute ahna amji caxàr? Hãpà! He Pahpām te amjia kôt, hàhcaprĩa kam, me ahna amji caxàr.

17 Ne pé Pahpām, hõ kàhhôc kam ramã ita na amji jarên to hane he:

“Ûhỹ Paro, itea wa Ejit jõ pjê jõpahhi na axãm.

Ne ite gũpar nare me, akrã tỳjti na aton.

Ampo na?

He akôt ite mehcunea mã icarôt to ipipẽ xà caxuw, wa ite pahhi na axãm.

Ne akôat quẽ ha mehcunea, pjê cunea kamme ijahkre pej” hane.

18 Hajỹr xà ita kôt, cu ha me Pahpām te amjia kôt jũm caprĩ, ne ahna amji caxàr na me hahkre pej. Ne hanea ne amjia kôt, cute jũm caca xàa to amji tẽte cumã ihkrã to ihtỳj na, me pamã hahkre pej.

19 Ne ca ihhêaj to me anõ ita na icukij to:

— Ne měr ampo na mã quẽ ha Pahpām jũm mã hũpar nare to, quẽ ha hũpar nare xà ata kam, jũ mã quẽ ha ajte Pahpām te ahna mẽn, mã cuteton ata jahpan xà na, ihkên mã cumẽ? Imãa Pahpām tejũm to hajỹr xà ita na ihkaj na. Jũ wỳr quẽ ha ajte jũm, Pahpām te amji mã ampo na prãm, ne ahna mẽn xà ata kaj na ihnõ to — hane.

²⁰ Co he! He nee ate Pahpām na me amji cukij xà hamreare! Quê ha pjê te pot ata ihcakôc na mã, xà quê ha ajkĩ ihtýj jũm te ton catê ata mã harkwa to:

— Ampo na mã ate iton to hajÿr? — hane. He cute amjina cute ton catê cukij xà hamreare.

²¹ Ne por jũm xũmre pot to ata te ihtýj pjê ata kam, amjia kôt to ipijakrut nehipej xà. Ne ajteare mã ampo pej pit caxuw, itato impejti ne. Ne ajteare mã cute ampokên pit caxuw ton ata te, nee cute ton catê na, ihcakôc xà hamreare.

Pê Pahpām rý pêa mã amji mã me pahcapi

²² Ata pyrác pej na mã, Pahpām teme pahton xà kam, cute me pahto amjikam hapac xà te hajÿr, pom quê pjête pot to cute amji kam hapac xà he. Ita na mã mehwý to amji kam hapac to impejti, ne mehwý to amji kam hapac xà to kêanre. Ne Pahpām mã mehcuneamã carôt týtji to ipipê toprãm, mãr quê mehcunea Pahpām te ma apu ampo kên caca atajê na, me hahkre pej. Cwýrjapê ri hàhcaprĩa kam, cute mehkên ton prãmti ton atajê na me hamãr to ipa, ne jũa caxuw mehkên mã me curê.

²³ Ne hanea ne Pahpām mã mehcunea mã hàhcaprĩhti na amji to ipipê to prãm. Cwýrjapê ri cute rý pêa mã amji mã me pahcapi, ne me pamãcarôt týtji jãhcujro impejti ata jôr, me papê hũràac to prãm to, na ri ramã cute me pahto impej. Na quê ha mehcunea me pahpupu, ne me Pahpãm pejtina me hahkre pej.

Pahpãm mã mehcakrit me, me cupê Juta catêjê atajê caprĩ

24 Pahpãm te me pahto hõ tekjêa prãmte ri, me cupê Juta catêjê kamcute amji mã me pahkwỳ capi, ne hanea ne mehcahkritatajê kam, amji mã mehkwy capi.

25 Pê Pahpãm ramã Hôxêj xwỳ pêharkwa na ihcakôc catê ata jõ kàhhôc kam, amji jarên to hane he:

“He por pê mam me cupê me ikwỳ nare atajê,
wa ha ita caxuw me cumã:

‘Me ikwỳ’ hane.

Ne pê mam imã mehkĩn nare atajê, wa ha ita caxuw me cumã:

‘Imã me akĩnti itajê’ hane.

26 Ne por pê wa pjê ita kam me cumã:

‘Nee me apê me ikwỳ nare’ hane, atajê mã, wa ha ita caxuw:

‘Me apê, ipê me Apãm tĩr rohnỳtti mã ata kra’ ” hane.

Hõhõ, pê Hôxêj xwỳ Pahpãm jarkwa na, hõ kàhhôc kam, mehcahkrit atajê na ihhôc to hane.

27 Pê hanea ne Ixaj xwỳ Pahpãm jarkwa na Ixaher catêjê na ihhôc to hane he:

“Ixaher catêjê jàhtô pê ihhêj rũm cõxwa jõ pjênxôm jàhtô cakrô, wa ha me pyxitre ne mehkên pê me hũtà.

28 Wa ha ipê me gõ Pahhiti, ne pjê cunea kam me hàhtôa te mehkên ton jahpan xà na, me to ihtỳj tu ne.

Ne wa ha me mõr pejti kam, ita cwỳrjapê mehcunea to hajỳr hiahpuro” hane.

²⁹ Ne pê Ixaj xwỳ hõ kàhhôc kam, hanea ne ihhôc to hane he:

“Quê ha me hirôa pê me pajõ Pahhiti carôt tỳjti
 ata, nee me pamã ihtàm xwỳ nõ juwahi
 nare na mã,
 cu ha rỳ pèa mã me papê Krĩhpôc jõ krĩ me,
 Krĩhcumrãrti pyrãac,
 ne ramã me pajamre tu ne” hane.

Hõhõ, Ixaj xwỳ te harẽn xà ita kôt, cu ha Pahpãm
 te amjia kôt jũm capi, ne ma apu ihnõ caca ata
 na me pamã hahkre pej.

*Juta catêjê pyxitre te hõtpê Jeju to amji
 mãihhimpej*

Roman 10.1-4

³⁰ He ca ihhêaj to me anõ me harkwa itajê na
 icukij to:

— Ampo to mã Pahpãm jarkwa na mehcahôc
 catêjê itajê ame pamã hahkre to prãm? — hane.
 Ỗhỹ, cute hajỹr he. Mehcahkrit atajê, nee
 Pahpãm wỳrme mõi na amji to me hahkre nare
 cakrô, mã ihtỳj Pahpãm te amji mã me capi.
 Ampo na? He cute Jeju to amji mã mehhimpej
 xà ata kôt ri, Pahpãm teme ahna amji caxàr.

³¹ Ne Juta catêjê nare. He Mojxe xwỳ te me
 to ihhimpej xà kôt, ihtỳj Pahpãm wỳr me ipa na
 amji to me hahkre cakrô, quê nee jũm hỹrmã
 mõi nare.

³² Ampo na? He Mojxe xwỳ te me to ihhimpej
 xàa kôt ri Pahpãm wỳr mehkràr, ne nee Jeju
 to cute amji mã mehhimpej xà kôt, hỹrmã
 mehkràrnare, cwỳrjapê ri nee hỹrmã jũm cator

xà nare. Ampo na? He me cumã Jeju pê Pahpãm wÿr pry kôt kēnti nō ata pyràac, na ri pry ita kôt me pra, mã mehtõtōc, mã me ajhu. Pom cu pry kôt me pra ne amji mã me parīt nare, mã kēnti me parē, ita jĭkjê na mã Juta catêjê ma apu Jeju curê. Ampo na? He nee amji mã me to mehhimpej prãm nare.

³³ Pê Ixaj xwÿ jō kàhhôc kam, Pahpãm ita na amji jarên to hane he:

“Wa ha Xijãw jō hàpkàjti cahêna Krĭpinkrên kam me ikwÿ mehkrĭ atajêwÿr, jũm kujate. Quê ha cupê pry kam kēnti catia pyràc ne jÿ, ne pry kôt me pra atajê jàhtôa ne mehtõtōc, quê ha me ajhu.

Hõhõ, quê ha cute me tohajÿr xà ita kam, quê ha me cupê Ixaher catêjê jàhtôa mã ihkĭn nare ne, quê ha ma amehcaca.

Ne quê ha mehkwy te amji mã me to ihhimpej catêjê atajê, quê ha ihtÿj mempej mã mehpÿm, ne ampeaj kam hÿrên me hakry” hane.

10

Pê Pawrô ajco Pahpãm mã mehkwy pê Juta catêjêcjrê

Roman 1.16-17; Carati 3.24-27

¹ Ÿhÿ, Jeju kam me ikjêjê. Imã me ikwÿ pê Juta catêjê kĭan to kĭn. Imã Pahpãm te, pom cormã kam me hapac nare atajê mea mã, mehkênpe me hÿtâr na me to prãm. Ne wa ijõtpe Pahpãm mã mehcajrên to hane he:

— Inxũ Cati, ca ha amji wÿr Juta catêjê pipkjêr na me to, quê me apkjê — hane.

² He ampeaj kam wa me amã harê. Cute amji to mePahpãm cajpuaw prãm to, ihtÿj me cumã amji jôr to prãm, ne cama me cupê, cute me cumã amji jôr xà ata cunea jahkre kêatre, mã ihkaj na ame to.

³ Ne me cumã Pahpãm te amji mã, me cute amji kam hapac xà jikôtti tũmti to ihcuhtac, ne to impej, ne me ahna amji caxàr na, me cupê hahkre kêatre. Ne teeamjia kôt ahte ame amji cuhtac, ne ame amji to impej to me hahkre. Ne ma ame Pahpãm te Jeju kôt amji caxuw me to ihcuhtacti, ne me to impejti xàata na me to ihcaca.

⁴ He ihtÿj Mojxe xwÿ jô kàhhôc ata kôt, tee ame amji kên tũmti, jikôtti atajê to ihcuhtac, ne me to impej to hahkre. Ne Pahpãm teramã Mojxe xwÿ jô kàhhôc ata jaxà kam Jeju Crixto xãm. Na quê ha cute amji mã me to ihhimpej catêjêatajê catyt kam, Jejua kôt cute amji kam me hapac xà cuhtacti to me ipa, mārquê Pahpãm hõ tekjêa na me ahna amji capa.

Pahte Pahpãm caca xà intuw ita mã me paxàr xà jahkre kêt nare

⁵ Pê ramã Mojxe xwÿ ampo itajê na Pahpãm te amji jarên xà na ihhòc to hane he:

“Quê ha jũm te, ite me cumã ijarkwa jirên xà itajê cunea to amji kam hapac to ipa, ne nee jũ caxuw ihnõ to hapac kêt nare na,

wa ha itỳj ahnaamji capa, quê ha icahê na ihkrĩ rohnýtti mã” hane.

⁶ Ne jũ wỳr quê jũm ita to, quê nee jũm ton nare. He pê mam Mojxe xwỳ, ma kēnti na api, pê kēn po kam Pahpām cumā harkwa jirên xàatajê cunea na ihhòc, pê cupy ne to wrỳ, ne me cumā cugõ. Ne pê cute amji mã Pahpām jarkwa to iwryc xà ita, cumā ihtỳaj to ihtỳj. Ne itakam nare. Xà quê ha ajkĩ Mojxe xwỳ cuxà, jũm ma JejuCixtô kòt còjkwa wỳr api, ne amji mã to wrỳ, cupê me pahkritxwỳ xà ita caxuw? Hãpà! Heramã amjia kòt me pahwỳr iwryc, ne cator.

⁷ Ne hanea ne, nee pjê krac ri mehtyc cahêna Jeju Cixtô wỳr jũm wrỳc, ne cuteto ihtĩr xà hamreare. Ampo na? He pê ramã Pahpām to ihtĩr ita kam, quêt nee me pamã pahte me cumã me pahcator xà ita tỳj nare. Ne pê Mojxe xwỳ hanea ne Ixaher catêjê mã:

⁸ “He ramã me pahcaxwãm pê me pamã Pahpām jarkwa na,
me amã hahkre pej” hane.

Ne cu ramã Jeju pê me pahkritxwỳ te me pahpytār catê na, me to amji kampa, ne amji mã me harê. Ne harên xà ita to wa hãn ne me cumã harên to ipa he:

⁹ — Ca ha me anõ te garkwa to gũjarên to: “Jeju pê mehcunea jõ Pahhiti” hajỹr, ne acaxwãm pê, ate amji kam gapac xà kam, Pahpām te hacpỹa mã to ihtĩr na amjimã to hajỹr

na, quê ha ihtÿj ampo kên kêanre ata pê apytà, ne ana amji capa — hane.

¹⁰ Ampo na? He cu me pahcaxwãm pê Jeju pê Pahhiti to amji mã me pahhimpej na, quê ha ihtÿj Hũm me pahna amji capa. Ne cu ha me pajarkwa to me Jeju jarẽnna, quê ha ihtÿj Hũm Cati pahkên pê me pahpytà.

¹¹ Ne pê ramã Ixaj xwÿ Pahpãm jarkwa na, hõ kàhhôc kam, Jeju na ihhôc to hane he:

“Ne por mehcunea Pahpãm te me pamã jũm kujahêc ata to amji mã me hajÿr atajê,
quê ha nee mehkên pê cute me hũtâr nare na,
amji naamehcãmji nare.

Ampo na?

Quê ha ihtÿj me hÿrmã cato ne me hũtà” hane.

¹² Ne cute harẽn xà ita ri, pjê cunea kam, mehcunea caxuw impej. Ampo na? He Juta catêjê me, mehcahkrit atajê pê nee ajteare mã, me cupê ajpên pê ajropê nare. Ne Pahpãm mã me ipipên pit. Ne cupêa rimehcunea jõ Pahhiti, ne ihtÿj mehcunea te amji tehcajpar xà caxuw, ahna me hàhwÿr catêjê tehcajpar to kryjre nare, ne me to impejti.

¹³ Ne pê ramã Jôwer xwÿ Pahpãm jarkwa na, hõ kàhhôc kam, ihhôc to hane he:

“Por ihkên pê cute me amji pytâr xà na me Pahhiti na ahwÿ atajê,
quê ha ihtÿj me amji pytà” hane.

Cute me cumã Jeju jarën nare ita kam, jũ wỳr quê amji mã me to hane

¹⁴ Ne jũ mã quê ha cormã amji mã me Jeju to hajỳr nare ita kam, cute ihkên pê me amji pytâr xà na ahna me hàhwỳr to?

Jũ wỳr quê me to.

Ne cormã nee cute me harën par nare ita kam, jũ mã quê ha me, ne amji mã me to hane?

Jũ wỳr quê me to.

Ne cormã neecute me cumã harën, mã cute me kam hapac nare ita kam, jũ mã quê ha me, ne kam me hapac to?

Jũ wỳr quê me kampa.

¹⁵ Ne cormã nee cute me cumã harën catê na, me jũm kujahêc nare ita kam, jũmã quê ha jũm me cumã harën to?

Jũ wỳr quê me cumã harê.

Pê ramã Ixaj xwỳ Pahpãm jô kàhhôc kam, me cumã harën catêjê to hũjarën to hane he:

“Me pamã hũjarën pejti to me cator xà ita pyrên ri ame pajakry” hane.

¹⁶ Mã Juta catêjê mã me hũjarën catêjê cator, ne me cumã Jeju pê me pahkritxwỳ jarën xà impejti to mehũjarën, mã cute mempar. Ne nee mehcunea te me harën par xà ata kôt, amji mã me to hajỳr nare. Ne pê hanea ne Ixaj xwỳ ahna ihhôc to hane he:

“Pahhiti! He ihhêj ne nee jũm te ijũjarën xà ita to amji mã hajỳr nare” hane.

17 Hõhõ, cu ha me pahteme Jeju Crixto pê Pahpãm kra, ne amji to me pahkritxwỳita na, jũmjê mã harẽ, quẽ ihhêaj to me pahkampa, ne por amji mã me ahna prãm catêjê atajê, quẽ ha ihtỳj to amji mã mehhimpej.

Juta catêjê mã Jeju jarẽn par prãm nõ tũam

18 He xà ajkĩ me cupê Juta catêjê te me Pahpãm kra jarẽn kam me hapacnare na mã, nee cute amji mã me to hajỳr nare? Hãpà! Ihtỳj cute me kam hapac, ne cama nee kõt me amji ton nare. Pê Tawi xwỳ ramã ita to, Pahpãm jarkwa na, hõkàhhõc kam hũjarẽn to hane he:

“Me hũjarẽn catêjê atajê cakõc xà ata, pjê cunea kam cute me kam hapac xà.
Ne ma pjê jicu xà mã me harkwa ata cator” hane.

19 Xà ajkĩ Juta catêjê te nee me Jeju jarkwa jahkre pej nare cwỳrjapê mã, nee cute amji mã me to hajỳr nare? Hãpà. He cute kam mehapac, ne me hahkre pej, ne me cumã impar prãm nõ tũam na ri, nee cute amji mã me to hajỳr nare. Ne quêt mehcahcrit itajê, ihtỳj amji mã me to hajỳr to me ipa. Ne pê ramã Mojxe xwỳ, Pahpãm jarkwa na, hõ kàhhõc kam, me ahna ihhõc to hane he:

“Ỳhỹ, ipê me Apãm Cati, ne wa ha itỳj jũmjê cahkrit me, krĩxàre krã te amji jahkre kêatre atajê tehcajpa.
Ne wa ha mehtehcajparxà ata kõt, ca ha ame hũ na mempej mã me hàr ata kĩn, ne me kam me acryc na me ato” hane.

20 Ne pê Ixaj xwỳ amji na hàhtàt nare kam me ahna, Pahpãm jarkwa na, ihhòc to hane he:

“Por pê nee ame ijapên nare atajê pê me imã cato.

Ne pê nee ame ina hàhcukjêr nare atajê mã, pê wa amji to ajpẽ” hane.

21 He pê hanea ne Ixaj xwỳ Juta catêjê na ihhòc to hane he:

“Ne pê amcro cunea kam, Pahpãm tee ajco me cupê Ixaher catêjê jũpar nare, ne ma amehcaca atajê mã ihhêj ne, hũ to apê, ne me cumã hũhkra pê, cuteamji wỳr me to ipipkjêr prãmte” hane.

11

Nee mã Ixaher catêjê cunea ame Jeju curê nare

¹ Xà ajkĩ Pahpãm ma amehkwỳ pê Ixaher catêjê atajê cunea caca? Hãpà! He pom ipê Ixaher catêjê nũa ita? Ne hanea ne me cuxà, ipêAprãw xwỳ tàm xwỳ nũa ita? Ne me iquêtti pê Pênjamĩ cukwa kam ri, nee Pahpãm te amji pê icaca xà nare ita?

² Pahpãm nee apu cute mam pjê te amji ton pê mã, amji mã mehkwỳ capi atajê caca nare. He me amã, Pahpãm jõ kàhhòc kam, Erij xwỳ pê me cumã Pahpãm jarkwa to ihcakòc catê ata te ahna ihcakòc xà ata jahkre pej. Ne Erij xwỳ te Pahpãm cunaa mã, cumã Ixaher catêjê kòt harên to kèanre to hajỳr he:

3 “Ijõ Pahhiti, ramã cute me cumã garkwa to mehçakôc catêjê jipej.

Ne hanea ne, ma ame ato amji japackre caca, na ri curi cute me amã ampo tocaxàr xà atajê to, cute me hamre tu.

Wa ipyxit peaj ne ijàhhuc, mã ita caxuw ihtÿj me cuxã, ame icuran to prãm” hane.

4 Mã Pahpãm Erij mã:

“Amãa ri, ca ahte apu apa, ne imã cute hajÿr nare.

Ampo na?

He cormã imã pjê ita kam, me hũmre te mir te xet

wa ite amji mã me capi, ne me huwahi, mãame ipa itajê,

ma ame hũm cahàc krekà pê Pahar atacaca, ne nee amji mã ame hũpa nare,

ne quêt ikôat ame ipa” hane.

5 He ita caxuw Pahpãm te amji kam hapac xàa na, amjia kôt, hàhcaprĩa kam me cupê Ixaher catêjê kwÿa kwÿ capi, ne amji mã me huwahi.

6 He xà ajkĩ cute me hàpên xà impejti ton cwÿrjapê mã, Pahpãm te amji mã me capi? Hãpà. He amjia kôt, hàhcaprĩa kam, cute me capi. Quê ha Pahpãm te me hàpênxà atajê kôt amji mã me capi na, quê ha nee cute amji kam hapac xàa na hàhcaprĩa kam amji mã me capi nare.

7 Pê Ixaher catêjê amjia kôt, cute me amji kam me hapac xàa na, Pahpãm wÿr me ipipkjêr to prãm, cute me ahna amji caxàr prãmte, ne neehÿrmã me cator nare. Mã Pahpãm te amji

mã menchrêre ne me capi atajê ri, hÿrmã me cator, mã cute me ahna amji caxâr. Mã ihhêj ne mehcahhur cuneajapactu, ne nee Pahpãm te me cumã hàkjêr xà ata na, me kam hapac nare.

⁸ Pê Mojxe xwÿ me, Ixaj xwÿ, ajwar ahpÿanre na me hõ kàhhôc kam, me ahna mehhôc to hane he:

“Pahpãm te me cupê mehkrã kam, me cute amji kam hapac xà cunea to ihcunĩ ita na, mã nee ita kam ihhêj ne me Pahpãm kam hapac, ne me hõmpun nare” hane.

⁹ Pê hanea ne Tawi xwÿ me ahna ihhôc to hane he:

“Pom hãn ne ampo pry mã mehhêj ne mehpro, ne me curê, mã ajhu ita jÿkjê na ri Pahpãm te, me hõ amji kÿnata kam mehkên mã me mên na, imã me to prãm.

¹⁰ Ne imã ate me cupê mehkrã cunea to ihcunĩ na me to prãm, mãr quê nee ampo kam hapac nare. Ne imã mehkên xà te me hirô pê ihpÿpÿm tu na, me to prãm” hane.

Quê ha nee cute me to ihcupan xà itajê mecumã irohnÿtti mã nare

Me Hàpên Xà 13.46; 28.23-28; Epet 2.11-22

¹¹ He xà ajkĩ Juta catêjê te ampo to ihcupan xà itajê me cumã irohnÿtti mã? Hãpà. Quê ha ihtÿj jÿ caxuw hacpÿa mã Pahpãm wÿr meapkjê. Mã Pahpãm te mehcahkrit atajê wÿr amji toirô, ne mam atajê jicu. Ne mam atajê te to ihcupan xà

kôt, mehcahkrit atajê te ampo pej pit na, me amji caxàr. Ata kôt quê ha me cupê Juta catêjê atajê, me hõmpu, ne ame hũ na mempej mãme hàr xà ata kìn, ne ihhêaj to hacpÿa ne Pahpãm wÿr me apkjê, ne me amji jaxà.

¹² He Juta catêjê te to ihcupan xà atajê jahpan xà na rì, mehcahkrit atajê te Pahpãm pìn, ampo pej pit hapôj atajê incwÿr. Ne quê ha jũ caxuw Juta catêjê te hacpÿa mã Pahpãm wÿripipkjêr, ne me amji jaxàr na, quê ha me hirôa pê Pahpãm pìn amji mã me ampo pej catia ne me to amcwa.

Juta catêjê pê pìxô pàr pyràac

¹³ Ita caxuw wa ha me apê mehcahkrit atajê mã amji jarê. Ipê me amã Jeju jarkwa na iprar catê. Ne ite amji kam ijapac xàa na, imã ijâpên xà ita peaj to impej, na wa xwÿ kam to ijâpên nare.

¹⁴ Ne wa Pahpãm wÿr me ato ipipkjêr to imõr xà ita kam, quê ihhêaj to me ikwÿ kwÿa nõ, ame gũ na me apej mã me acjêj xà ita kìn, ne hacpÿamã Pahpãm wÿr amji jaxà, mâr quê ahna amji capa.

¹⁵ Ne Pahpãm te mehkwÿa kwÿ pê Juta catêjê atajê jicu, ne me apê mehcahkrit atajê wÿr ipipkjêr, ne me ana amji caxàr, na ca hacpÿa mã ajpên to me gõ ikwÿ nõ. Na quê ha jũ caxuw me cupê Jutacatêjê hacpÿa mã Pahpãm wÿr me amji jaxà, ne ampeaj kam me hakry to hanea, pom quê ihhêj rũm me cupê me hũkjê ty, ne hacpÿa mã me kôt ne mehtír, mã hÿrên ame hakry ata to, quê ha ame hakry.

Me papê pìxô pàr jarê pyràc

16 Ita caxuw wa ha me amã ampo itajê kôt harên to incre. Quê ha me anõ mã gõ pur kam ampo pĩxô pàr na, xà ca ha ajkĩ harê to pit mã gõ tekjê? Hãpà, ca ha hanea ne ipàr kam ihpa itajê cunea togõ tekjê. Měr hõhõ, he mam me cupê Juta catêjê atajê pê pĩxô pàr jarê ata pyràac, ne me cupê Pahpãm tekjê, ne mehtàmwxwỳ itajê pèpĩxô pàr pa atajê pyràac, na ri hanea ne me cupê Pahpãm tekjê.

17 Ne me apê mehcahkrit atajê pê, ihhêj rũm ahkêt kam pĩxô pàr te ihcuhhê, ne cupê jũm te to hõ tekjê nare ata pyràac. Ne por pur kam jũm pĩxô pàr to hõ tekjê ata, quê ha hõ pĩxô pàr ata pa kên nõ jakep, ne cumẽ. Ne ma cute mõi ne ahkêt kam ihnõ xa ata pa jakep, ne pur kam cute hõ pĩxô pàr pa jakep ata wỳr to amji jaxàr, ne cute hakep, ne mèn ata jaxà kam tocaxwỳr. Mã cute ahna impỳn, ne ihkat kam mam harê ata kôt ri, ihtỳjipicamẽn to mõi. Ita jĩkjê na mã, Pahpãm te me apê mehcahkrit to hajỳar, ne cute Juta catêjê kèanre atajê jicu, ne me ana ipyr ne mehaxà kam amji wỳr me gacjên. Ca menquêtjê pê pĩxô pàr jarê pyràacti ata kam, atỳj me apicamẽn to me mõi.

18 Cwỳrjapê ca ha nee me cupê Juta catêjê pê pĩ pàr pa, mã cute me hakep ne me irên atajê na ame acakôc kên nare. Ampo na? He cute me hakep xà ata kôt, nee ate amji to me acati prãmte, cute me hakep nare. Ampo na? He me apèpĩxô pàr pa ata pyràac, ne jũ wỳr quê pĩxô pàr pa nõ harê to ihhimpej, ne harê ri quêt ipàr pa cunea to ihhimpej. Cwỳrjapê ca nee jũmjê jaxà kam me gàhhuc ata to amji to ame acati

prãm nare.

Pahte Jeju to amji mã me pahhimpej, na ri me haxàr xà kam me paxàr xà

¹⁹ Na ca ihhêaj to me anõ imã garkwa to:

— Juta catêjê itajê jaxà kam me ixãm prãmte ri, Pahpãm te me hìcu, ne põ mã me cator, wa me haxà kam me ijàhhuc ita kam, mõrmõ maramã Pahpãm amehcaca — hane.

²⁰ Ne Jeju to cute amji mã mehhimpej nare cwýrjapê ri, cute põ mã me cator, ca me haxà kam me axàr. Ampo na? He ate Jeju to amji mã me ahimpej, na ri me haxà kam me axàr xà ata to, ca me amji japackrea ne. Cwýrjapê ca ha nee cute me ato hajýr xà ata pyrên amji to ame acati prãm to me apanare, ne quêt cama amji mã me hũpahti to me apa.

²¹ Ne por jũm te pĩxô pàr to hõ tekjê ata te ipàr tète kam ihpa kênjakep, ne cute mên ata pyrác pej na mã, Pahpãm te Jutacatêjê kèanre atajê jìcu. Na ca ha me guphêa ne. Ampo na? He nee me apê mam Pahpãm na mehkwyè pê Juta catêjê atajê nare, ne me apêmehcakrit. Na ca ha meapê me hũràac, ne me akên xà kèanre nõ to, quê ha ihtýj me gìcu.

²² Ita na cu ha Pahpãm jàhcaprĩhti na me hõmpu, ne hanea ne cu ha, cute ampo kên cwýrjapê me to kèanre xà na, me hahkre pej. Ne ate Jeju to amji mã meahimpej catêjê mã ri, ihcunea na Pahpãm pej. Ne ma ame Jeju caca, ne mehkrã kèanreatajê mã ri, hanea ne Pahpãm kèanre. Quê ha cute me acaprĩ kam to incrà ita na, ca ha me apej ita na ame apa. Nãmri quê ha

cute me acaprĩ jicu na, quê ha hanea ne, me gicu ne me akên mã me arẽ.

²³ Ne quê ha hanea ne Juta catêjê te Jeju caca jicu, ne hacpỹa mã cumã me amji jõr na, quê ha ihtỳj mehkwy mã me haxà. Ampo na? He quêihtỳj Pahpãm ita to hane.

²⁴ Me apê mehcahkrit atajê pê ahkêt kam pĩxô pàr pa, mã cute hakep, ne pur kam ihnõ ata kam hãm ata pyràac. Ne me cupêJuta catêjê atajê pê ri, por cute me pĩxô pàr pa jakep, ne me ihnõ mã to hãm xà caprãr ata pyràac. Na quê ha to hõ tekjê ata mã hacpỹamã ihkwỳ kam hãm to prãm na, quê ha ihtỳj hacpỹa mãihkwỳ kam hãm. Ampo na? Hepĩ pa ata pê ri quêt ihpaa to ihpa. Na ri hacpỹ mã cute kam hãm xà na cumã ihcacure. Ata pyràc pej na, quê ihtỳj Pahpãm hacpỹa mã Jutacatêjê kwỳ mã mehkwy jaxà. Ampo na? He me cupê mehkwyà to mehkwy, na quêihtỳj hacpỹa ne mehkwy mã me haxà.

Quê ha jũ caxuw Juta catêjê cute me amji kam hapac xà to antuw

Ruc 21.24; Jowãw 10.16; Carati 3.22

²⁵ Ỡhỹ me ikjêjê, ca ihhêaj to me anõ te, hahkre kêt kam amji krã kreti na, ate amjicãmjĩ cupate, wa ha me amã Pahpãm te imã ampo to hahkre xà ata jarẽ, ca ha me hahkre pej to impeaj ne. He pê mam, nee jũm ampo itajê nõ jahkre pejnare. He quê ha me cupê Juta catêjê, Pahpãm cuna mã mehkrã tỳjti ita na me to hãmtu nare. Ampo na? He quê ha Pahpãm mehcahkrit atajê te hỹrmã me ipipkjêr atajê cahyt, ne me to hàntô xà atamã

hahê, ne me hicu. Ne hacpÿa mã me cupê Juta catêjê wÿr apkjê, ne me ahna cupy.

²⁶ Ata to, quê ha mehkên pê, me cupê Juta catêjê cunea pytà. Ne pê Ixaj xwÿ ramã Pahpãm jarkwa na, hõ kàhhôc kam, me ahna ihhôc to hane he:

“Quê ha jÿ caxuw Xijãw jõ kên cahêna Krÿpinkrên pÿn me pahkên pême pahpytâr catê ata cato, ne Jaco pê Juta pãm ata tàmwxwÿ catêjêintête, cute amji kam me hapac xà kên to pøj partu.

²⁷ Quê ha Pahpãm me cumã amjijarên to hane he:

‘Pê wa rÿ pêa mã me amãite me akên to pøj xà ata na, me amã amji jarêa na, wa ramã me atête to pøj to mõi he’ ” hane.

²⁸ Ne ita caxuw, cormã me cupê Juta catêjê ma ame Jeju pê mehkên pê me hÿtâr catê na me harên par caca xà ata to ri, cute amji to me Pahpãm curê xwÿn. Na ri me apê mehcahkrit atajê te Jeju to amji mã me ahimpej atajê pê Pahpãm na mehkwyã. Ne pê rÿ pêa mã Pahpãm ramã amji mã menquêtjê capi, ne me cumã amji to ata na, cormã to amji japackre. Cwÿrjapê ri cormãcumã mehtàmwxwÿ catêjê atajê kwÿ kÿn rohnÿtti mã.

²⁹ Quê ha Pahpãm te amjimã jÿm capi, ne cute to impejti na amji ton na, quê ha nee jÿ caxuw jÿm ita to hapac kêt nare, ne ihtÿj to amji japackre rohnÿtti mã. Ne nee cute ahna amji ton xà ata kaj na, ihnõ na to ipintuw nare.

³⁰ He pê ramã rỳ pêa mã, me apê mehcahkrit atajê inquêtjê ajco me Pahpãm jarkwa kam hapac nare to me ipa. Na pê ajco nee me caprĩ nare. Neita kam nare. Ihtỳj cute me cupê Juta catêjê jũpar nare atajê jaxà kam me acaprĩ, ne me ato amji kwỳ.

³¹ Ne quê ha ihtỳj jũ caxuw Pahpãm me cupê Juta catêjê jũpar nare atajê caprĩ to hanea, pom quê cute me acaprĩ he. He Pahpãm te me caprĩprãmte ri, ihhêj ne amehkên ton to me ipa.

³² He me pahcunea jũpar nare kam ri, Pahpãm te me pahcunea pro, ne ihhêj rùm me pahto me hacjên catêjê pyràac. Ne mêr ampo na mã cute me pahtohajỳr? Nee mã ampo na nare. He cute me pahcunea caprĩ prãm to ri, cute me pahto hajỳr.

Pahpãm te amji jahkre pejti ita rya to iry

³³ Ỳhỳ, ampeaj kam Pahpãm mã hàhcaprĩ ita catia to cati! Ne cumã cute amji jahkre pejti ita rya to iry! Ne me hirôa pê ihkrã kre cati! Ne quêcute ampo to ihhimpej xà na to ihhimpej na, quê nee jũm ihkôt hahkre pej nare. He hũ na cute ton xà ata jahkre kêatre. Quê ha hõtpê cumãhahkre peaj xà na ihtỳj to. Ne jũm mã quê ha ajte, cute amji mã Pahpãm te amji kam hapac xà to, cute amji mã ihhimpej xà atajê nõ kôt hakop nehahkre pej? Hamreare, he caxuw jũm jamreare.

³⁴ Pê ramã Ixaj xwỳ hõ kàhhôc kam, ita to hũjarên to hane he:

“Jũm mã quê ha ajte me pajõ Pahhiti mã ihkrã kam, cute amji kam hapac xà ita jahkre pej?

Hamreare!

He nee jũm te me pajõ Pahhiti jahkre pej xà caxuw hamreare” hane.

³⁵ Ne pê me iquêtjê nõ japrý te Jo ita, hõ kàhhôc kam Pahpãm na ihhôc to hane he:

“Xà ramã ajkĩ Pahpãm te jũm to new xà caxuw, cute cumã ampo jõr?

Hãpà!

He ampo itajê cunea Pahpãm tekjê pit ita kam, jũ mã quê ne jũm cumãampo gõ, quê to new? Hamreare!” hane.

³⁶ Hõ, he pê Pahpãm amji mãã, ampo itajê cunea ton partu. Ne nee ihkaj na, iràn xà na, jũm teamjia kôt ampo itajê nõ ton nare. Mãnee hanea ne ampo te, amjia kôt amji ton nare. Ne Pahpãm ri ampo cunea to ihhimpej. Na cu ha amcro cunea kam me pahcunea Pahpãm cati na amji mã me to, me pajũjarên to me papa! Ampeaj kam!

12

Pahpãm ihtýj me pamã me pahteamji kam me pajapac xà to ipintuw partu

Pirip 4.8-9; 1 Texarõn 4.1-3

¹ Ýhý me ikjêjê, pom ramã Pahpãm te ampo jàhtôa na me pahcaprĩ hyre nare ita? Cwýrjapê wa ate me cumã amji jõr xà caxuw me anaahwý.

Ate amji to me Pahpām cajpuaw xà na, ca ha cumã me amji gõ, ne cumã pit mã ate me gápên to me apa na, ca ha atýj amji mã me to cati to me mõ.

² Ne nee ca ha amji na pjê ita kam, Pahpām curê xwýncatêjê te mehkên ton catêjê jamâr, quêamji kôt me aton nare. Ne quêt cama amji na Pahpām jamã, quê amã ate amji kam gapac xà to ipintuw partu. Quê ha me ato hane, ca ha me Pahpām te ampo pej cunea, kam ampo kên jamreare, ne ihcajpuaw atajê jahkre pej.

³ Pahpām te amjia kôt ito, ite me amã harkwa jarên catê ne ahna ixãm. Cwýrjapê wa haityj me gapackre, ne me ato ihmpej to ipa, ca ha me ikampa. Ne nee ca amjipeaj to apej na, amji to ame gãmra nare. He Pahpām te ri ate amji mã to ahimpej xà ita na cute aton. Na ca me akwý, xwý kam amji mã me to ahimpej nare, ne me akwý kwý, cormã kyre pê amji mã me to ahimpej. Ca ha ate kyre pê Pahpām to amji mã ahimpej na, ca ha nee ahna amji jarên to:

— Wa ramã xwý kam Pahpām to amji mã ihmpej to ipa nare — hajýr nare.

Me papê Jeju jãa pyrác

⁴ Ne me pajĩ pyxit peaj ne kam, ahpýanre na, me pahcukrã xà itajê mã hápên xà.

⁵ Ita jĩkjê na mã Jeju Crixto kam pahte me ajpên hõnco catêjê, ajpên kam me pahpyxit peaj. Ne ahpýanre na me pamã me pajápên xà ita pê me pajĩkam ahpýanre na me pahcukrã xà atajê pyrãac.

Pahpãm te ahpÿanre na me pamã me pajàpên xà jõr

⁶ Mã Pahpãm te amjia kôt ahpÿanre na me pamã pahte amji kam me pajapac xà te amji jahkre pej jõrpartu, ahpÿanre na me pahte cumã me pajàpên xà ton xà caxuw. Na quê ha Pahpãm te harkwa to ihcakôc catêjê na me pahkwÿa kwÿ pyxwÿr na, cuha pahtÿj cute to ihhimpej xà ata na mehcunea mã harkwa to me pahcakôc to me papa.

⁷ Ne quê ha cute me pahte mehtehcajpar catêjê na me pahkwÿa kwÿ pyxwÿr na, cu ha pahtÿj mehtehcajpar to me papa. Ne quê ha cute ampo tome cumã hahkre catêjê na me pahkwÿa kwÿ pyxwÿr na, cu ha pahtÿj me cumã ampo to hahkre to me papa.

⁸ Ne quê ha cute, me pahte cumã me hũcanãr ton xà caxuw me pahkwÿa kwÿ pyxwÿr na, cu ha pahtÿj me cumã me apô ne me cumã hũcanãr ton to me papa. Ne quê ha Pahpãm te, me pahte me cumã me hàhcukrêj to me papicokjêr catêjê na mepahkwÿa kwÿ pyxwÿr na, cu ha me pajàhcajrên jõxÿ nare kam, me pahtÿj me cumã me to me papicokjêr to me papa. Ne quê ha Pahpãm te me topahhimpej catêjê na me pahkwÿa kwÿ pyxwÿr na, cu ha pahtÿj me pahkrã kreti kam me pajuphêa rûm me to me pahhimpej to me papa. Ne quêha Pahpãm te me pahte me caprĩ catêjê na me pahkwÿa kwÿ pyxwÿr na, cu ha pahtÿj me pamã amji kïan kam ame caprĩ, ne mehtehcajpar to me papa.

Cu ha caxwãm catia mã me ajpẽn kїн to me papa

Epet 4.25-5.2; 1 Petrô 3.8-12

⁹ Ca ha nee apu amji krãhky na me akwỳ kїн nare, ne quêt caxwãm catia mã amehkїн to me apa. Ne ma apu amji pê mehkên caca, ne quêt impejtica me hũnãr to me apa.

¹⁰ Por ca Jeju kam ajpẽn to me akjêjê atajê, ca ha me apeaj kam, me ajpẽn kїн to me apa. Ne amji mã me akjêjê to me catia to me apa, ne ajpẽn cupahti to prãmti to me apa.

¹¹ Ne nee ca me gãpên xà kam ame xuwaca to ame apa nare, ne quêt ampeaj kam me gãpên prãam kam me pajõ Pahhiti mã me gãpên to me apa.

¹² Ne me gakrya kam, Pahpãm pїн me amã ampo pejti cator xà ata jikaj to me apa. Ne atỳj ampo te me ato jũ mãn xà atajê mã me gũcanãr to meapa. Ne nee jũ caxuw Pahpãm mã me acakôc jicu nare, ne nee me cumã amji cajrên jicu nare.

¹³ Ne quê Jeju kam ajpẽn to me akjêjê pê ampo jamreare ata me amã, ca ha atỳj me cumã to ajcokjê. Ne atỳj me gũrkwa kam jũa rũm me akjêjême ipa atajê jamã, quê me acahê na ame ipa.

¹⁴ Quê ha cute me ato kên prãmte, ame acapôr to me ipa atajê mã, ca Pahpãm na ahwỳ, quê me to impej, ne quê nee gahpan xà na ame to kên nare.

¹⁵ Ne me cumã amji kїнti atajê cahê na me amã amji kїнti ne. Ne ame amrã atajê cahê na atỳj ame amrã.

16 Ne me acunea hãn ne me acaca xà na, me acapēnti to me apa, ne nee ame ajpēn rēn nare. Ne amji mǎ mehcunea cupa to me apipēnti to me apa. Ne neeapu amji to me acati prām to me apa nare. Ne ca ha atỳj me amā ihcunea na me akwỳ pē mehkryjre atajē kīnti ne. Ne nee ca me hirôa pē amjikrã kreti na amji to gàmñān to me apa nare.

Cu ha nee amji jahpan xà na jũm to kēn nare

17 Ne quē jũm ato kēn, ca nee amji jahpan xà na to kēn nare. Nemehcunea mǎ ampo pejti atajē to pit mǎ gápēn to me apa.

18 Ne quē jũm apu amān kēanre, ca ha nee amji jahpan xà na cumān, ne apu cume apijapu nare.

19 Me ikjêjê, quē jũm ame ato kēn, ca nee Pahpām pē gàmțâr, ne amji jahpan xà na ame kam acryc nare. Mǎr quē Pahpām me gahpan xà na ame kam incryc. Ampo na? He ramã Pahpām te hõ kàhhôc kam me ahna amjijarēn to:

“He pa wa ha cute ame ato kēn atajē jahpan xà na amcwa,
ne ijàm cwỳr xà ita pē ite ame to kēanre xà”
hane.

20 Ne Pahpām mǎ cute mehhôc catêjê te ramã hõ kàhhôc kam, harkwa na ihhôc to:

“Quē acurê xwỳn mǎ prām, ca ha atỳj cumã harte, nare, quē cumã kôr, ca ha atỳj ihkôm.
Ampo na?

Ca ha ate to hajÿr na, quê ha cama apu akamih-pahàm, ne cute apu ato kên xà ata jũ na ihpeacre ne, ne nee hipêr amji to cupê acurê xwÿn to prãm nare”

hajÿr xà ata kôt, ca ha to.

²¹ Na quê ha jũm te apu ato kên na, ca ha nee amji jahpan xà na apu kam acryc nare, ne cama to ìmpejti ne. Hõ, ca ha ate ita to me hajÿr na, quê hanee hipêr cupê acurê xwÿn nare, ne cama cupê gõ ikwÿ nõ rohnÿtti mã.

13

Cu ha pahtÿj amji caxuw me pajõ pahhi kwÿ kampa

Tito 3.1; 1 Petrô 2.13-17

¹ Ne ca ha me acunea me cupê pahhi catêjê kam me gapac to me apa. Ampo na? Nee mã ampo na nare. He Pahpãm te ri pahhi na, pahhi catêjê itajê pyxwÿr, cute me ato ihhimpej xà caxuw. Jũ wÿr quê Pahpãm te pahhi na jũm xãm prãm nare kam, quêamjia kôt cupê pahhi.

² Cwÿrjapê quê ha jũm te hõ pahhi par nare, ne ma apu ihcaca na, quê ha ma ramã apu Pahpãm te pahhi xãm ata par caca, ne ma apu Pahpãm caca na, quê ha ihtÿj jũ caxuw amji kên mã amji mẽ.

³ He xà ajkĩ catyt kam me ipa catêjê mã me hõ pahhi cupa? Hãpà! Ne por mehkên ton to me ipa atajê mã ri ihtÿj me hõ pahhi cupa. Nãmri quêha amã gõ pahhi cupa nare to prãm na, ca ha nee apu akên ton to apa nare, ne quêt catyt kam

apejti na apa. Quê ha ramã pahhi me apupu, ne me garên pejti to me ipa.

⁴ He me apejti to prãm to ri, Pahpãm jarkwa kôt pahhi ata hâpên xà ata to apê. Nãmri ca ate akên ton to apa na, ca ha atỳj amji mã pahhi ata teato kên xà ata cupa to apa. Ampo na? He pahhi ata te ihtỳj akên jahpan xà name ato kêanre xà. He Pahpãm mã ri pahhi ata apê, cwỳrjapê quê ha ihpĩan ajpên cumã cute akên mã amên xà caxuw harkwa cato.

⁵ Cwỳrjapê ca ha atỳj pahhi catêjê cunea kampa. He xà ajkĩ Pahpãm te me pahkam incryc, ne ame pahto kên xà ata cupate pit mã, cu ame pahhi catêjê kampa? Hãpà. He ramã pahte mempar xà na me amji jahkre pej.

Cu ha nee ampo to jũm to new nare

⁶ Cwỳrjapê ca ha hanea ne pahhi catêjê atajê te Pahpãm krac ri cumã hâpên to me ipa ata jahpan xà na, atỳj hãn ne me cumã gàmjör to me apa.

⁷ Nãmri ca ha me anõ te cormã cumã gàmjör nare na, ca ha atỳj cumã amgõ. Nare, ca ha ate cumã me gâpên xà na, ca ha atỳj cumã apê. Ne amji mã me hũpahti to me apa, ne amji mã me harên pejti to me apa.

⁸ Ne ca ha ate jũm to new na, ca ha atỳj cumã amgõ, mãr ca nee ate to new ata na apa nare. Ne ampo ita pyxit peaj, ca ha atỳj me ton to me apa he. Ca ha atỳjme amã ajpên kĩnti ne. Ne ate ajpên to mempejti to apa xà ata pê ri ihhêj rũm ate me ajpên to new. Ca ha ate me ajpên kĩnti to me apa na, ca ha ramã me Pahpãm te me amã

harkwa jirên atajê cunea kam me gapac to me apa.

Cu ha pahtÿj me ajpën kîn to me papa

⁹ Ata pê ramã rÿ pêa mã Pahpãm me pamã harên to:

“Ne por ramã me amã me aprõ, ne me amã me apjê atajê,
ca ha nee ahti na meiràn xà na, jÿm me ajpën caxun nare.
Ne nee jÿm curan nare.
Ne nee ajpën pê ame gâhkÿj nare.
Ne nee ajpën jÿ na ame ampo kîn to me apa nare” hane.

Ne Pahpãm te me pamã harkwa jirên itajê cunea pipën pit. Ne ihnõ ita pê ri ihhêj rÿm ihcunea pyrác, ata te hajÿr he:

“Ca ha me amã me akwÿ kîn hanea, pom quê amãa amji kîn he” hane.

Cu ha pahte ihkôat me ton to me papa na, cu ha ramã ihkôtihkwÿ cunea ton to me papa.

¹⁰ Quê ha jÿm mã mehkwy kîn na, quê ha nee jÿ caxuw ame to kên nare. Hõhõ, cu ha ame pahkwÿ kîn to me papa xà ata pê, ramã pahte me Pahpãm te me pamã harkwa jirên xà ata cunea kam me pajapac to me papa xà.

Cu ha Jeju te amji kam hapac pejti to me amji tÿj

Epet 5.14-21

11 Ne ampo na mã cu ha ame amji to hane? Nee mã ampo na nare. He me pahkwya kwỳ, nee hacpỹ ne Jeju te amji jaxàr, ne ampo kêncunea pê me pahto cator xà ita to, me amji japackrenare, ata pê ihhêj rûm ihtỳj cute ame hikwa ne ame hôt pyràac. He me pahpytâr xà jô amcro ramã ajpên hàhtêp to mō, cwỳrjapê cu ha mepahte me amji kam me pajapac xà kujrō, quê apu ampra. He maam pahte Jeju to amji mã me hajỹr xà jô amcro ata japyre mã ri, ramã cute me pahpytâr xà jô amcro ajpên hàhtêp to mō, ne ramã hàhtêp.

12 Ne caxwa jô awcapàtkô kam, jũ wỳr ca apu amji mã hamã ne apu mō. Ne apê kam, ca ha atỳj amji wỳr ampo te ato kên xà ata pupu, ne cupêamji pytà. Ita jĩkjê na, quê ha akam Jeju te amji kam hapac xà tuw pejti hamreare, ca ha nee akên catianō pê amji pytâr nare. Ne quê ha Jeju me awỳr cato, ne ihtỳj me akên xà catia pê me apytà. Ne mehkêanre catêjê ri hōtpê caxwa ri ame ampokêanre ton to me ipa, quê ha apê, quê ha me ton to hicu. Ne nee me apê cute me hajỹr catêjê atajê pyràc nare, na ca ha me akên ton jicu, ne catyt kam me apa rohnỳtti mã. Ne pom krãhtare ipijapu xà caxuw hàprê xà to amji tỳj, ita jĩkjê na, ca ha Jeju te amji kam hapac xà tuw pejti to me amji tỳj, ne ihkôat catyt kam me apa. Mãr ca ate to ihcupan xà pê meakên catia ata pê me to amji pytà.

13 Ne catyt kam me pahpahàmti to me papa to me hanea, pom quê amcro jàhcujro kam mehpahàmti to me ipa he. Ne nee ajpên kam mare mã amji to ame axy to me apa nare. Ne

nee còxýthti toame amji to apipãn to me apa nare. Ne nee ame cahãj xyre atajê caxun nare, ne nee ame to apahàm nõ to me apa nare. Ne nee ame apijapu to me apa nare. Ne nee amji jũ na ame ampo kĩn nare.

¹⁴ Ne nee ca ha mam ampo kêanre atajê to me amji cajpuaw to prãm to, ame amji kam gapac to me apa nare. Ne quêt me pajõ Pahhiti pê Jeju Crixto te amji kam hapac xà tuw pejti ita to, cu ha ampo kên cunea pê me amji pytà.

14

Cu ha pahtỳj ihcunea na ajpẽn na me amji to pøj to me papa

¹ Ỗhỹ, he ca ha, por kyre pê cormã Jeju to amji mã mehhimpej atajê, ca haatỳj me akwỳ kam, ahna me amji capa. Ne nee ame acaca xàa na, ahpỹanre na ame hũn, ne ame ahna xwỳ nare, ne quêt hipêr Jeju kôt me ipicamẽn na, ca mehtehcajpa.

² Ampo na? He ramã me akwỳ xwỳ kam Jeju to amji mã mehhimpej nare, na quê ha ihtỳj me hõ itajê cunea ku. Ne nee me akwỳ kwỳ te me hajỳr nare, ne cormã kyre pê Jeju to amji mã mehhimpej. Na ri ihtỳj me amji mã me hõ to me hàpàn xà atajê cunea cawpa to:

— Jũ wỳr wa ijõ ita krẽ, kôt mã ikam tẽ, nare, quê me ikra kam tẽ — hane.

³ Ne por ca atỳj me gõ cunea ku atajê, nee ca ame akwỳ te ihcaca catêjê mãn kên nare, ne aracri me hõmpu. Ne por ca nee ame hõ ata kur nare atajê, ca ha nee kam ate me cumãn xà ata

to me curê mã me irĕn nare. Ampo na? He ramã Pahpãm te me ahna amji caxàr.

⁴ Ne cupêa ri me hõ Pahhiti, ne nee me apê me hõ pahhi nare. Ne taa mã quê ha mehkwy na ihcakôc to kêanre to prãm, ne me to ihcakôcto kêanre, nare, quê ha me to ihcakôc to impejti ne. Me hõ Pahhiti quê ha cute me hâpên to hamãr na me to, quê ha me to hamã, quê ha ihtÿj mempej.

⁵ Ne me gakrã kam me akwy, ma ame amji mã me amcro kên na me aprã. Ne mehkwy ihtÿj me amcro kên me, impej picacwÿr na me harê. Ne itacaxuw ca ha ahpyanre na, ate me amji kam gapac xà jahkre pejti xà atajêa kôt me apa.

⁶ Ne me gakrã kam, me akwy te Pahpãm to amji japackre xà caxuw, ramã amji mãme amcro capi. Ne me gakrã kwÿ kam, me akwy te Pahpãm to amji japackre xà caxuw, ihtÿj me hõ cunea ku, ne hÿrên me hakryti na, cumã me amji jarê. Ne me gakrã kam me akwy te Pahpãm to amji japackre xà caxuw, nee me hõ cuneakur nare, ne ihtÿj me ajcri. Ne me ipijacri xà ata kôt ri Pahpãm te me to impejti na me amji jarê.

Cu me pahte Pahpãm cajpuaw prãmte ame papa

⁷⁻⁸ He nee cu amji mãa, me pahnõ apu papa nare. Ne me pahte me Pahpãm cajpuaw prãmte, cu ame papa. Ne nee cu amji mãa me pahnõ pahtyc nare. Neme pahte me Pahpãm cajpuaw prãmte, cu ame ty. Neme pahtÿar kam cupê me pajõ Pahhiti, ne hanea ne me pahtyc xà jirô pê, cupêa ri me pajõ Pahhiti.

⁹ Ampo na? He me pajō Pahhiti pê Crixtô tyc, ne hacpÿa mã ihtĩr, mārquê cupê mehtyc me, mehtĩr jō Pahhiti.

¹⁰ Ita kam, jũ mã ca ha ajte, ne me akjêjê kwÿ te amji kam hapac xà pê ajteare mã ita kôt, ca ame cupê cute to ihcupan catê na me cumã hacjê? Ne me ca, meca xwÿjê? Jũ mã ca ajte ame, ne me akjêjêa kwÿ to mehkryjre to prãm to ame apa? Hãpà! Ahna cute hajÿr nare! Ampo na? He cu ha jũ caxuw mepahcunea Pahpãm cuna mã me pahcuhhê, quê ha taa me pahcukij xà kêanre ata to me pahcukij, ne me pahkwÿ cukij xà impejti xà ata to me pahcukij, ne ma ajpẽn pê me pahto ajcokjê.

¹¹ He pê ramã me Pahpãm hõ kàhhôc kam me pahna amji jarẽn to:

“He ipê itĩr rohnÿtti mã ata catê wa,
na ca ha jũ caxuw me acunea me akryjre na ate
me imã amji jarẽnprãmte,
icuna mã me akõn krã na me jÿ, ne meimã: ‘Quêt
apê Pahpãm to apêPahpãm’ ” hane.

¹² Hajÿr xà ita kam, jũ mã cu ha me? Cu ha ahpÿanre na Pahpãm mã pahte amji to me pahhimpej xà atajê me, me pajapên xà cunea na me amji jarẽn partu.

Cu ha nee me pahkjêjê nō Pahpãm pê ipictor na hamãr nare

¹³ Cwÿrjapê cu ha ajpẽn pê me pajō me, pahte amji kam me pajapac xà na me pahcakôc jicu. Ne jũ to ca ha quêt me? Ca ha me ate amji kam

gapacxà cunea to catyt kam me apa. Ne nee ca me ate amji kam gapac xà kên ton to me apa xà ata to, me akjêjê te cormã kyre pê Jeju to amji mã mehhimpej atajê te mehkên ton na me ton, quê mehkên mã mencjêj nare.

¹⁴ Pajõ Pahhiti Jeju kam me pahte amji hõnco xà ita kam, ramã pahte me pajõ te me pahto kên xà nare na, hahkre pej pejtu. Nãmri quê ha jũm te amji mãhõ kêanre na harên, ne hanea ne Pahpãm mã ihkêanre na harên na, quê ha ihtyj hõ ata cumã ihkêanre ne. Ne cute Pahpãm mã hõ ata kên naharên jipy ihkrêr na, quê ha Pahpãm mã jũm te hajjyr ata kêanre ne.

¹⁵ Quê ha me akjêjê nõ te cormã kyre pê Jeju Crixto to amji mã ihmimpej ata te gõ ata kur na gõmpun, ne amã ihcawpa to:

— Ca ate gõ ita krêr na ihkaj na — hajjyr na, ca ha nee gõ ata krêr nare. Nãmri ca ha ate gũpar nare, ne mãnea mã ihkrêr na, quê ha nee amã akjê ata kinnare. Quê ihhêaj to akjê ata akõt hũpa kam cukrê, ita na Pahpãm pê me akam ihkaj na. Ne hanea ne Jeju te akjê ata kritxwỳ na amji ton, ne haxà kam ihtyc na, ca to amji japackre. Ne nee gápàn xà ata cwyrjapêapê akjê ata Pahpãm pê ipictor na hamãr nare.

¹⁶ Quê jũm mã ate ampo ton xà itajê na akam ihkaj na, ca ha hicu, ne nee hipêr ton nare, mãr quê nee ampo pejti ita kên na harên nare.

¹⁷ Ampo na? He Pahpãm himpej xà nee me pajõ me, me pahkõm xà to amji kam hapac to ipa nare. Ne quêt Pahpãm Carõ Pejti kõt, catyt kam me papame, me pahcarĩcti kam, me pamã amji kĩnti to ri amji kam hapac to ipa.

18 Ne jũm te Jeju Crixto mã hãpên xà to hãpên to impejti to ipa to hajỹr te ri Pahpãm cajpuaw. Mã hanea ne mehkwỳ jũm ata jarên pejti to me ipa.

Me pamã, nee me pajõ cawpa xà hamreare

19 Cwỳrjapê cu ha ajpẽn kam me pahcapẽn pej pêa mã me papa na, cume amji to prãm. Ne hanea ne pahte me ajpẽn tehcajpar to mepapa na, me pahtehcajpar xà ata to, cu ha me.

20 Me papê Jeju tekjê catêjê mã, nee me hõ cawpa xà nare. Na cu ha pahtỳj me pajõ cunea ku. Quê nee me pajõ nõ me pahnõ to kên, nejũm to kên nare. Nãmri quê ha jũm te hõ ata kuar kam amji mã cute mehcawpa xà ata cupa na, quê ha Pahpãm mã jũm ata pê ampo to kênecatê. Cwỳrjapê ca ha nee cumã, Jeju wỳr jũmjê incjêj ne cormã kyre pê amji mã me to ihhimpej atajê mã, me akõt me cumã me hõ cunea to hahkrenare. Quê ihhêaj to cute ampo krêr xà ata kam ihcawpa xà ata to amji japackre, ne cumã hũpa na, quê ha ihtỳj ihkên mã axà.

21 Na quê ha me pajàpàn xà me, me pahkõm xà me, ampo kwỳ te Pahpãm pê me pahkjêjê kwỳ to kên, ne cupê me to hũjawry na, cu ha mehcuneajicu, ne nee hipêr mehcaxun nare.

22 Quê ha amã gõ cunea kur xà caxuw impej na hahkre pej na, ca ha ate ihkurxwỳjrea na Pahpãm mã ahna amji cajrên to hane he:

— Ca ate, ite ampo itajê cunea kur xà na imã ton, cwỳrjapê wa ha itỳj cukrê, ne nee ihcawpa xà nõ na to amji japackre, ne apu hũpa nare —

hane. Ne nee me akwỳ kwỳ mã ate ihkrēr xà ita na amji jarēn nare. Nearacri amji mã:

— Wa Pahpām mã ampo pejti itajê pit ton to ipa, mār quê nee ihkôt ikên mã imēn nare, ata pyrên ri ijakry — hane.

²³ Nāmri quê ha jūm ata te ampo ata krēr xà ata kam, amji mã ihcawpa to:

— Pyp̄yn, mōrmō ajkĩ ite ijō krēr xà ita na Pahpām mã ipej, nare, mōrmō ajkĩ ipej nare — haj̄yr jipy, cute ihkrēr na, quê ha ramā amji kên mã amji mē. Hō, quê ha jūm te Pahpām jarkwa kôt cute ihkrēr na amji jahkre pej nare kam ihkrēr na, quê ha ahna Pahpām pē kam ihkaj na. Hō, cu ha amjia kôt, me pahte Pahpām jarkwa jahkre pej nare kam, ampo ton na, quê ha Pahpām pē ahna me pahkam ihkaj na.

15

Cu ha nee pahte amji to amji cajpuw prām to pit mã me papa nare

Pirip 2.3-5

¹ Ne pom cu ramā xwỳ kam Jeju to amji mã me pahhimpej nare itajê, cu ha, pom cormā kyre pē amji mã me to ihhimpej itajê tehcajpa, mār quê haneane me pahcuxà, xwỳ kam amji mã me to ihhimpej nare. Ne cu ha nee pahte amjito amji cajpuaw prāmte ame papa nare.

² Ne quêt ita to cu ha me he. Cu ha pahtỳj me pahkjêjê impejti xàwỳr me mōr na mehtehcajpa, quê me mō, mār quê Jeju to amji mã mehhimpej xà to me ajcamē.

³ Ne mē̄r ampo na mǎ cu ha me ita to? Nee mǎ ampo na nare. Pê me pajō Pahhiti pê Jeju Crixto nee cute amji to amji cajpuaw prām to, pjê kam apu ipa nare. Ne ihtÿj cute amji pupun xà ata caxuw apu mō. Pê ramā Pahpām jō kàhhôc to hūjarēn to hane he:

“Inxū, por cute me acrôn xà kêanre to me acrôn atajê te me ato tojnō, ne ma iwÿr me ipipkjêr, ne ame icrôn xà kêanre to ame icrô” hane.

Pahpām jarkwa jō kàhhôc pê me pamā ampo to hahkre catê

⁴ He pê nee Pahpām ihcaprÿ na mam hō kàhhôc tūm ata kam harkwa na, ihhōc na me mēn nare. Ne cute me pahcunea mǎ ampojãhtōa to hahkre xà caxuw, pê harkwa kôt hō kàhhôc ata kam mehhôc. Ne Pahpām jarkwa ihtÿj ampo kēn mǎ me pajūcanār na me pahto, ne haneane me pajakryti na me pahto. Na cu ha pahtÿj me, por jū caxuw Pahpām cahê na ame papa xà ata na, me hikaj. Ampo na? He jū caxuw cute me pahto catia, mǎ me papê hūrãac xà na me pamā hahkre pej.

⁵ Wa ijōtpê Pahpām mǎ me acajrēn to hane he:

— Ÿhÿ me ijō Inxū Cati pê Pahpām, he ca ihcunea caxuw me imǎ me ijūcanār xà pê me ijō katcrà gō, wa itÿj me awcanā. Ne ma akra pêJeju Crixto kam me akwÿ itajê te ajpēn hōnco na me to, mār quē ihkôatcute amji kam hapac xà pyxit peaj to amji kam me hapac to me ipa.

⁶ Ne me harkwa pyxít peaj to me garën pejti to me ipa, ne me amã: “Apê me ijõ Inxũ Cati pê Pahpãm, ne apê me ijõ Pahhiti pê JejuCixtô Pãm, ne ihcunea na ampeaj kam apej” — hane.

Quê ha mehcahkrit atajê, hanea ne me cupê Jeju namehkwý mã axà

⁷ Ne me pajõ Pahhiti pê Jeju Cixtô te me ana amji caxàr xà ita na, ca ha me akwý na me amji to pøj to me apa. Hõ, ate me to hajÿr xà ata to, caha me amji mã Pahpãm to cati.

⁸ He pê rý pëa mã Pahpãm ramã me cupê Juta catêjê quêtjê mã cute Jeju Cixtô kujahêc na amji to awjahkre, mãr quê cato ne cupêmehtehcajpar catê. Mã Jeju cator xà ata te, Pahpãm teampeaj kam to hũjahkre xà na amji par na harën.

⁹ Ne hanea ne cator xà te, mehcahkrit atajê te Pahpãmjàhcaprĩhti na harën na me ton. Ne pê Tawi xwý ramã hõ kàhhôc kam, ita na me to hũjarën to hane he:

“ÿhÿ, wa ha mehcahkrit atajê jipôc ri gaprý na icrer to impejti ne,
ne wa ha itÿj me cumã ato ijàmñãn to ipa” hane.

¹⁰ Ne hõ kàhhôc kwý kam hanea ne to hũjarën to hane he:

“Me apê mehcahkrit me, me apê Ixaher catêjê pê Pahpãm na mehkwý atajê mea mã,
Pahpãm pyrên me gakry!” hane.

¹¹ Ne hanea ne to hũjarën to hane he:

“Ne por me apê mehcahkrit cunea pêIxaher
 catêjê nare atajê,
 ca ha atÿj me pajõ Pahhiti to amji mã me gãmñãn
 to me apa” hane.

¹² Ne hanea ne Pahpãm jarkwa to ihcakôc catê pê
 Ixaj xwÿ jõ kàhhôc kam, pê to hũjarên to hane
 ne:

“Quê ha jũ caxuw menquêtti pê Jexê tàmwxwÿ
 tàmwxwÿ nõ cato.
 Ne cupê mehcahkritatajê jõ Pahhiti.
 Quê ha ihtÿj cupê me hõ Pahhitina amji mã me
 to ihmipej to me ipa” hane.

*Pê Pawrô pjê cunea kam, mehcunea mã
 Pahpãm jarkwa jarên to ipa
 Epet 3.1-9; 1 Petrô 1.12-13*

¹³ Ne Pahpãm ri pahte me hikaj, mã me
 pajũcanâr na me pahto, cu me hikaj. Ata kôt
 imã, cute me amã amji kĩnti me, me acarĩcti jõr
 na, toprãm, mãr ca nee amji mã ampo cupa nare.
 Ne hanea ne imã Pahpãm Carõ Pejti carôt kôt me
 gũcanâr, ne me hikaj xà ata te me amã ipicamên
 to mõi na, me ato prãm.

¹⁴ Ỹhÿ me ikjêjê, he me apejti, ne me akrã kreti
 to atÿj me ajpên japackre to me apa na, imã me
 gahkre pej.

¹⁵ Cakrô wa amji mã ijàhkyaj kam, hirãa pê ite
 me amã ampo itajê na ihhôt, mãr ca me cahyt,
 ne me to amji japackre. Ne mõi ampo na wa ite
 amjimã ijàhkyaj kam me amã ihhôt? Nee mã
 ampo na nare.

16 He Pahpām te ito icati, ne mehcahkrit atajê jipôc ri, cute ihcāmter Jeju Crixto mā ipê cumã ijàpên catê na ixãm. Por pê Pahpāmmã mehcajrên catêjê ajco cute amji to me Pahpām cajpuaw prāmte me cumã ampo gō, ata jikjê na, wa ityj ite amji to Pahpām cajpuaw prāmte, hÿrmã mehcahkrit atajê to ipipkjêr to ipa, mār quêPahpām me cumã Carō Pejti gō.

17 Ne Jeju Crixto kam ite amji hōnco xà ita kôt ri, imãa Pahpām mā ijàpên xà cunea impej pit.

18 He xà itea ijàpên xà impejti ita na, amji to ijàmñān xà caxuw mā, wa apu amji jarên to ipa? Hãpà. He Jeju Crixto te ri ite mehcahkritte Pahpām jarkwa kam hapac naitehcajpar, mā cute mempar. Mã cutea, ite me cumã ijūjarên xà na iton, ne caxuw imãite amji jahkre pejti jōr.

19 Ne cute imã Carō Pejti carôt jōr, mār wa carôt ata kôt me cumã ampo pihho pejti to, quê me hōmpu, ne me Pahpām to me amji japackre. Ne itakam wa ma Krîpinkrên pîn, Iririj jō pjê wÿr imōr xà ata kam, wa ityj mehcunea mā Jeju Crixto pê me pahkritxwÿ na harên xà impejti atajêcunea na harên to mō.

20 Wa ijōtpê, por nee rÿ jū ri jūm te me cumã Jeju Crixto pê me pahpytârcatê na harên nare ata wÿr, wa ikrâr. Ne nee wa ramã jū ri jūm te me cumã harên ata wÿr ikrâr nare.

21 Ne pê ramã Pahpām jō kàhhôc kam Ixaj xwÿ ita to hūjarên to hane he:

“He por rÿ jū caxuw jūm te me cumã Pahpām
kra jarên nare atajê,
quê ha ita caxuw me kampa, ne me hōmpu.

Ne por rỳ jũ caxuw cute me Pahpãm kra jarẽn
par nare atajê,
quê ha me kampa, ne me hahkre pej” hane.

*Pê Pawrô Jeju na mehkwỹ pupun prãmte me
hỹrmã ihkràr*

Roman 1.8-15

²² He wa tee me awỳr ikràr, ne me apupun to
prãm. Mã ma ijàpên xà icahpêrkàr to ipa ita
kam, jũ wỳr wa apu amji mã hamã.

²³⁻²⁴ Ne rỳ pêa mã, wa caku jàhtôa kam me
awỳr ikràr, ne me apupun to prãm, ne hamre,
ramã ita caxuw ite pjê itajê kam ijàpên xà
jipêjpartu. Cwỳrjapê wa ha ma Cra jô pjê wỳr
imôr xà ita kam, wa ha me anaa mõi, ne me
apupun to ramã ite amji kam ijapac. Ne wa ha
meawỳr icator xà kam, quê ha ampeaj kam me
pamã amji kїн. Wa ame acahê na imôr xà ata
kam, ca ha ampoto me itehcajpa, ite to Cra jô pjê
wỳr imôr xà cahhurkrã curan xà ata caxuw.

²⁵ Ne wa ha xa me awỳr imôr xà ita kam, mam
Krĩpinkrên kam Jeju namehkwỹ atajê tehcajpar
prãmte, me hỹrmã icato.

²⁶ Ampo na? He Maxeton jô pjê me, Crec
jô pjê kam Jeju na mehkwỹ pê mehcahkrit
atajê te, Krĩpinkrên kam me cupê hamreare
atajêtehcajpar prãmte, amjia kôt me imã ihpore
to cuprôn, mâr wa curi to icato, ne Jeju na
mehkwỹ pê Juta catêjê pê hamreare atajê mã to
ajcrã.

²⁷ Me cutea ri me ita to me hajỳr to me amji
kam hapac. Na ri ihhêj rũm ramã mehcahkrit
itajê te, me cupê Juta catêjê to new, na quê ha

ihtỳj me amgõ. Ampo na? He pê mam me cupê Juta catêjëitajê, mehcahkrit atajê wỳr, ihtỳj me Pahpãm jarkwa kujahêc to me ipa. Mã me harkwa kôt Pahpãm wỳr me ipipkjêr, ne mempej mã me hâr, ata jahpan xà na ri, hacpỹa ne cute me cumã ampo itajê kujahêc.

²⁸ Ne ite curi to icator, ne me cumã me hũhkra kam me hõ pore ata cunea to icahkũmjirô pê mã, wa ha Cra jõ pjê wỳr imõr xà ata jõ pry kôt me awỳr mõ.

²⁹ Ne me awỳr icator xà ata kam, quêha Jeju Crixto cukwa kam ampeaj kam mepamã ampo pej cunea hàhtô, na ramã imã hahkre pej.

³⁰ Me ikjêjê, cu me pajõ Pahhiti pê JejuCrixto to amji mã me pahhimpej, neCarõ Pejti ata kôt ri me pamã ajpên kĩn ata kôt, wa me ana ahwỳ, mâr ca icuxà xwỳ kam Pahpãm mã me icajrên nare.

³¹ Ne cumã me icajrên to hane he:

— Me ijõ Inxũ Cati, ca ha Juta jõ pjê kam amji mã me ato ihmipej nareatajê pê Pawrô pytã. Ne hanea ne cute me akwỳ mã ihpore jõr xà ata kam, quê nee ihpore ata to me amji na ampo kên cãmji, ne amehcaca nare, ne quêt ihtỳj me hakrya kam, ihpore ata na me amji capa — hane.

³² Hõ, ca ha Pahpãm mã me icajrên to hane, ne quê ha Pahpãm mã ito hajỳr to prãm na, wa ha icator xà ata kam, quê ha me pamã amji kĩnjakryti ne. Ne pahte me ajpên pupun xà ata kam, quê ha Pahpãm ajpên pyrên me pajakryti na me pahto.

³³ Ne imã Pahpãm pê me pamã me pahcarĩcti jõr catê ata te me acahê na ipa rohnỳtti mã na,

me ato prãm. Hamre.

16

Pê Pawrô me cumã amji jarên kujate Me Hàpên Xà 18.1-3

¹ Ýhỹ, ita caxuw, wa ha me amã hàpà, ne me amã me pahkjê cahãj pê Pepkwỳj kujate, ne me amã ihkôt harê. He cupê Ampohy jô krĩ kamJeju na mehkwỹ tehcajpar catêjê nõ.

² Na ca ha ahna me amji caxàr to hanea, pom què ate Jeju na me amji caxàr he. Hõhõ, Jeju na mehkwỹ to pahte amji kam me pajapac tohajỹr xà pit. Ramã cute me hàhtôa tehcajpar, ne haneane itehcajpar, na ca ha atỳj ampo to mehtehcajpa.

³ Ne hanea ne Prixirakwỳj me Aquira pê mam ajco icahê na Jeju Crixto mã me apê atajê mã ite me amji jarên kujahêc.

⁴ Ne pê Jeju jàpên xà kam, cute me itehcajpar xà ata kam, cute amji to mehtyc xà jàhtôa jakren. Cwỳrjapê wa me cumã me hũrên ijakryti naamji jarê, ne nee wa ite ahte ijakryti na me cumã amji jarên nare. Ne hanea ne me cupê Jeju na mehkwỹ pê mehcahkrit atajê te mecumã hakryti na amji jarên.

⁵ Ne wa hanea ne Jeju Crixto na mehkwỹ te me hũrkwa kam me cuprõn catêjê mã, ite amji jarên kujahêc. Ne wa hanea ne ite imã ikwỳ nõ kĩnti pêEpet te Axij jô pjê kam, cupê mam Jeju to amji mã ihhimpej catê ata mã, ite amji jarên kujahêc.

⁶ Ne hanea ne Marij te ramã me amã hàpên crire nare ata mã, ite amji jarên kujahêc.

⁷ Ne hanea ne Antrôn me Juna pê me ipyràac, ne me cupê Juta catêjê pê mam icahê na me hacjên xà kam mehcuhhê atajê mã, ite meamji jarên kujahêc. Ne me cupê Jeju jarkwa na memprar catêjê na, ramã ite me hõmpun pejtu, ne pê mam ramã icumam Jeju to amji mã mehhimpej to me ipa.

⁸ Ne hanea ne, por me pajõ Pahhiti pê Jeju kam, cupê ijõ ikwý nõ pê Amprij ata mã, ite amji jarên kujahêc.

⁹ Ne hanea ne Rupan pê me icahê na Jeju Crixto mã hàpên catê ata me, me imã ikwý nõ kînti pê Xaqui mã, ite amji jarên kujahêc.

¹⁰ Ne wa hanea ne Aperti te mehcunea kam mare mã Jeju Crixto to amji mã ihmipej, ne cumã hàpên catia ata me, Arixô me, mehkjêjê mã, ite amji jarên kujahêc.

¹¹ Ne wa hanea ne Herotãw pê ipyràac, ne cupê Juta catêjê nõ me, Narqui me, mehkjêjê pê Jeju na mehkwy atajê mã, ite amji jarên kujahêc.

¹² Ne wa hanea ne Tripenkwyj me, Triponkwýj pê me pajõ Pahhiti mã hàpên catêjê atajê me, Penxikwýjpê imã me ijõ ikwý nõ cahãj kîntite Pahpãm mã hàpên catia ata mã, ite amji jarên kujahêc.

¹³ Ne hanea ne wa Rupo pê me pajõ Pahhiti mã hàpên catê catia ata me, inxi te ihhêj rûm ito ihkraa, ne ito impejti ata mã, ite amji jarên kujahêc.

¹⁴ Ne hanea ne, wa Axin me, Precon me, Mecurij me, Patropa me, Herma me, me pahkêjê cunea apu ihkôt me ipa atajê mã, ite amji jarên kujahêc.

15 Ne hanea ne wa Piror me, Jurijkwỳj me, Nerew me, ihtōj me, Orimpa me, Jeju na mehkwỹ cunea cahê na ame ipa atajê mã, ite amji jarên kujahêc.

16 Ne me amã ajpên kĩãn kam me ajpên mã me hàpà. Ne ita ri me cupê Jeju Crixto na mehkwỹ cunea te me amã amji jarên kujahêc.

Quê ha cute me pahto ipicapôn prãm atajê to amji na me pajuphêa ne

1 Jowãw 3.10; 4.1-6; Epet 5.6-7

17 Me ikjêjê wa ha cormã me gapackre to incrire ne, ihkàhhôc ita jicu xà kam. Ýhỹ, ca ha ma amji na, cute me Jeju to, ate amji mã me ahimpej tète me acahpêrkàr, ne ite me amã ampo tohahkre atajê tète me girên ne me ato ipicapôn prãmcatêjê to, amji na me guphêa ne. Neampya mã ame cupê me apa.

18 Ampo na? He cute me hajỹr catêjê, me pajõ Pahhiti pê Crixto pê ampya mã ame ipa, ne nee me cumã hàpên nare, ne amji cajpuaw cute ampo na mehprãmti xà ton to me ipa. Ne me harkwa cakôc xà hêj xi xà picre to, cute me amji jahkre kêatre catêjê mã mehhêj to me ipa.

19 Ne me ca nare, ca quêt atỳj me gũcanãar kam Jeju to amji mã me ahimpej to me apa. Cwỳrjapê ri me apyrên me ijakry pit. Ne imã me ate, me ampopejtĩ ton na ate amji jahkre pejtĩ na, imã me ato prãm, ne me apê ampo kên ton jahkre kêatre na imã me ato prãm.

Pahpãm kôt me papa xà ita kôt, cu ha Xatanaj tohjê

20 Ne Pahpãm pê me pamã me pahcarĩcti jõr catê xakat, ne quê ha me amã me acarĩcti gã, mår ca nee ame pahcurê xwÿn pê Xatanajata cupa nare. Ampo na? He quê ha me pahcurê xwÿn ata curan pej to hàhtũm nare to hanea, pom ca me apar kàhtÿjti to me cagã krã gã he. Ne imã me pajõPahhiti pê Jeju Crixto te ihcunea na me ato impej na to prãm.

Pê Pawrô cahê na mehkwÿ krĩ atajê me cumã amji jarên kujate

21 Ne Timot pê icahe na hàpên catê ita te hanea ne me amã amji jarênkujahêc. Ne hanea ne Rutikwÿj me, Jaxãw me, Xõpat pê me ipyrãac, ne hanea necupê Jeju na mehkwÿ kam Juta catêjê kwÿa kwÿ atajê te me amã amji jarên kujahêc.

22 Ne ipê Tertur pê Pawrô kôt ihkàhhôc ton catê te hanea ne me amã amji jarên kujahêc, Jeju jarkwa na.

23 Ne wa Cajo jũrkwa kam ikrĩ, mã hũrkwa kam Jeju na mehkwÿ me cuprõ atajê te hajÿar, ne me amã amji jarên kujahêc. Ne Eraxõ pê krĩ jõ pahhi mã ihpore jamãr catê me, Jeju kam me pahkjê pê Cwatro te me amã amji jarên kujahêc.

24 Ne imã me pajõPahhiti pê Jeju Crixto te ihcunea na me ato impejti name ato prãm. Ỹhÿ, he ampeaj kam.

Cu ha hõtpê Pahpãm to me pajãmnãn to me papa

Epet 3.20-21; Juta 24-25

25-26 Imã me acunea mã, Pahpãm jãhcaprĩ mã me pahtehcajpar na, me ate me hahkre pej na, me ato prãm. Ampo na? Nee mã ampo na

nare. He pê rỳ pêa mã Pahpãm Jeju Crixto pê me pahkritxwỳ na, to amji kampa. Mã rỳ jũcaxuw jũm te, Pahpãm te Jeju Crixto to me pahkritxwỳ na hahkre pej nare, ne me cupê ipimxur tu. Ne pêramã rỳ pêa mã Pahpãm jarkwa na, cute mehhôc catêjê ita na mehhôc, ne cute me ahna ihhôc xà ata, pê nee hirã pê hũjarên nare, ne harên xàincwỳrpê harê. Ne ita caxuw Pahpãm tĩr rohnỳtti mã ata te nee to ipimxur nare, ne hirãa pê to ipipê xà caxuw, ahna harkwa hyr, mãr quêpjê kam, mehcunea me hahkre pej, ne amji mã me to ihmipej, ne ihkôat me ipa. Ne Jeju pê me pahkritxwỳ ita to, pê wa Pahpãm jarkwa kôt, me amãicakôc. Ne Jeju to ate amji mã me ahimpej xà ita kam, quê ha Pahpãm ihtỳj me atehcajpa, mãr ca jũ caxuw me hicu nare.

²⁷ Ne Jeju Crixto cukwa kam, quêha pjê kam mehcunea me Pahpãm pyxit peaj, neihkrã krea to ihkrã kre na me hahkre pej, na cu ha mecumã:

— Quêt apyxit peaj ne ampeaj kam akrã kre rohnỳtti mã. Ýhỹ, he ampeaj kam — hane. Hamre, ijõ kàhhôc ita pit.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a